

OTHELA WA

MWAAPWITTIPWITTHI



Kooxukhuru, Munna Edmonds. Apwiya yooreeriheni.

Muhiileliwa, apatthani. Vekeekhai oreeriwa-tho ohiy'ula okhala va muTapernakulu M'opatthana. Okathi ovinryaaka, oxe kuw'ola, khuweha vatthu vaary'aya, ni khoona nuulumo "Opatthana," eyo yaahikilikanela oratteene. Okisivela eyo, Munna Edmonds. Opatthaana, ti yeeyo enaamini ahu.

² Mpatthani aka mmosa a khalayi, onammalaru orowa owaani okhala n'Apwiya, khino anci-ene a nyuwo mwaanimusuwela, Dr. F. F. Bosworth, anci-ene a nyuwo. Kookupali, wira owo aari wenno ni miyo oPhoenix, emaara emosa, munepa woominyala. Ni owo aari mu... aahikhalana mu—mu... Owo aari mutthu mulweene ooreera murima, masi aahikhalana moonelo w'otheya. Nto owo aahikiirela, emaara emosa, owo iirale... Miyo kaakhala kilavulaka mwaha wa opatthana. Nto owo khwira, "Munna Branham, moosuwela opatthana exeenii?"

Miyo khwira, "Ahe, kinoona wira ayo, Munna Bosworth."

³ Owo khwira, "Ankhala apatthani aili mpaketini." Vano, eyo ekeekhaii, okawana opuro mmosa ni mukhwaawe.

⁴ Ni koowoona anci-ene a nyuwo nvenxale matata, mwaamusuwela Munna Bosworth. Okhalaka wira—wira nyuwo mwaanimusuwela, kaathuna kilavule nuulumo na okathi awe wookiserya mu elapo ya vathi. Miyo kaanimusuwela okathi munci-ene. Vano owo aaira alaleyaka Ehapari yooreera ni waavekelela aretta, miyo kihinatthi oyariwa. Vano munoowerya woona munnuwelo aarinaawe. Apwiya aamutthuniherya okhala, kinoona wira, miyaakha soophiyaka miloko mithanu na miraru ni mithanu, etthu siiso, nave nlelo mulopwana mmosa oominyala okathi owo okhwiyaawe.

⁵ Okathi waarinaawe miyaakha miloko mithanu na miili ni mithanu, kookupali wira yaari siiso, owo ni miyo naari o... kookupali waari, Oteeli Edgemont oMiami. Ni naahimala olya yoolya—yoolya ahu ya ohiyu, nto nikhuma orowa weetta okerekhere wa ephareya weiwo mawipi yaakelaaya, wira niwehe mweeri okhumaka. Nto kaarina, miyaakha soophiyaka miloko mixexe, makhata aka oowuuramela vathi, keettaka siiso. Ni owo, miyaakha soophiyaka miloko mithanu na miili ni mithanu, oowookowa ntoko saaweryaawe okhala. Vano miyo khunweha, ni kimuxankela. Nto miyo khwira, "Munna Bosworth, kintthuna kookoheni etthu emosa."

Owo khwira, “Kohakani, Munna Branham.”

Nto miyo khwira, “Liini waari okathi anyu wooreera?”

⁶ Owo khwira, “Naanaano va.” Ahe, vano, miyo kaahuuliwa muru. Nto owo khwira, “Nyuwo munooliyala wira miyo ka mwaana paahi, kinkhala empa ya khalayi,” owo khuhimya. Nto owo aari Munna Bosworth.

⁷ Vaiwaly’aka wira aarowa okumana n’Apwiya, miyo kaahalela opaha epenewu ya ekaaro aka, kirowaka oMiami, wira kamoone. Nto amwaar’aka ni miyo vaphiyalyaahu iwe. . . Nto amusi Bosworth n’amusi ahu yaari opatthani wuulupale. Nto hiyo khuvolowa. Tiithi mutokweene aammaathale vakhaterani. Ni owo aahivenya, muru awe mwaamukhaani wa ntari, khookola miyoono sikhaani, sooyeva khukivarela, *siiso*. Maithori emoraka mmalakuni mwaka. Miyo khumpatikha, ni khukhuwela, “Atithi aka, atithi aka, ikaaro sa wIsarayeli n’anakhavalo aya!” Okhala wira, akhala mutthu otonko ophwanyiha nttittimiho mmweetteloni mwa Pentekosite, aari Munna Bosworth. Vekeekhai aari yoowo. Owo aari nluwa nuulupale.

⁸ Ni nyuwo moosuwela, etthu yoopacerya owo aatthunne awe wira, waari okileela eperwa ekhaani, *siiso*, moosuwela.

Nto miyo khwira, “Munna Bosworth, munoorowa openuwa?”

⁹ Owo khwira, “Nnari, Munna Branham. Nkinwereiwa, opacerya wene.” Owo khwira, “Kinrowa Owaani paahi.”

Miyo khwira, “Ahe, ti yooreera saana.”

¹⁰ Hiyo naammalaru orwa okhuma mmapuwani mwa miteko sa omisiyonaariyu wAfrika, owo ni miyo. Owo khwira, “Miyo nkireere wuuluvala wira kitthikele kikhalaka.” Owo khwira, “Kinrowa Owaani.”

Miyo khwira, “Munna Bosworth, exeeni mwaarowaanyu okilopola wira kiire?”

¹¹ Nto owo khwira, “Mukhale ni Ehapari yooreera.” Nto owo khwira, “Mutthikele mmapuwani mwa miteko sa omisiyonaariyu vowaakuva sinwery’anyu.” Khwira, “Iwo waarowa okhala woolopolani waka.”

¹² Nto miyo khwira, “Munna Bosworth, etthu emosa ekina kaatthunaaka wookohani.”

Owo khwira, “Exeeni iyo, Munna Branham?”

¹³ Miyo khwira, “Vano, moovahererya miyaakha miloko mithanu na mosa wa Apwiya, mmutekoni, wala khino soovikana.” Nto miyo khwira, “Okathi xeeni waari woohakalalaxa mookhalaru?”

Owo khwira, “Naanaano va.”

Nto miyo khwira, “Munna Bosworth, moosuwela wira munookhwa?”

14 Owo khwira, “Khivanweryaneya miyo okhwa. Miyo kikhwiye miyaakha sinci-ene khalayi.” Nto miyo...Owo khwira, “Munna Branham, sothene kiphentaly’aka ni kicali-waka mwaha wa seiyo miyaakha miloko mithanu na mosa sivinre, kimmulipelela Owo ohula mukhora ole khula okathi ni orwa, okikuxa.”

Kinuupuwela yeeyo, *Masalmo A Ekumi*:

Makhalelo a atthu aalupale anninuupuxerya
 Ninoowerya okhaliha makhalelo ahu
 oottittimiheya,
 Naarowaka, ohiya ottuli wahu,
 Maravulo vamithaakani sa okathi.

Ni vekeekhai owo oohiya maravulo, wa miyo.

15 Owo ohinatthi okhwa, ahiiso, pa-...orowa Movuwani, ntoko ewoora emosa, wala khino yoovikana, owo ohinatthi okhwa, owo aahirupa okathi vakhani, nto amwaar’awe, an’awe, oophentiwa awe yeemenle erukurenrye, vano mutokweene owo khuvenya, khuwehaweha, khweemela, khutthimaka nno ni nno, ni khuvahana matata n’ame awe yaawo yiira eronwe miyaakha sinci-ene, n’atithi awe. Nto voovikana ewoora emosa, owo aahivahana matata n’atthu, airaka, “Ola ti Munna John. Ayo, nyuwo mwaarwiye wa Kristu vamuthukumanoni vaka oJoliet, Illinois. Va ori Munna . . .” Avahanaka matata n’ale oorukunxa murima awawe yaakhwiye, mwa miyaakha sinci-ene.

16 Ki—kinimooleelani, imaara sikina kinnaamini wira okathi onviraahu elapo ela nirowaka ekina, kookupali wira okathi owo okathi...Muratthi onoorowa okhala woorika olapuwa, khula enamuna, nyuwo moosuwela. Kookupali wira khino Apwiya anaaleela oophentiwa ahu, “Murowe mpakha omurathini mwakumane ni yaawo weiwo.” Tthiri ntoko Yakope sihimaly’awe, ninoothukumanyiwa n’atthu ahu nihiku nlo.

17 Ni miyo kinnilipelela nihiku nlo ophiya. Vano kamaliha—ru ekumi ila nno, ahiiso Muluku amalaha—ru okirumeela nno, ni koona wira kooxintta khula ekuru kaaweryaaka, kooxintta khula mukattiyamiho, ni koowela khula ntumuxa, kintthuna kiwehe ottuli, koone vaary’aka—vo, kaphiya—ru omuro.

18 Miyo kweekwe kinnihimyaka, ntoko atthu ooriipa va, awo aakhalana nsipo naamukhaani awo aniip’aya, “Miyo nkinthuna hata mulattu omurathini.” Miyo kinthuna kireherye sothene naanaano va.

19 Khino kimuttikiherye xoowa munluwoni, ni orula ekapaseti, kipwehe mukerekhere, kivenxe matata aka, kikhuwele, “Muruuhe mwaatiya wo woopola ekumi, Tithi. Kinrwa owaani voosiis’ula.” Owo onookhala vaavo. Muhixanke. Miyo kinnaamini yeeyo. Kinoona wira iwo p’utthuna wa khula mmosa wa mirima sahu.

²⁰ Vano, vekeekhai oreeriwa wuulupale okhala va ohiy'ula ni pastore ola oophenteya ni ekereja awe, ni muteko ola woothamaleya, ni ala aneetta mwa Kristu, epantte ela ya oPhoenix. Tthiri, vekeekhai, hiyo na anawetta. Hiyo n'anawetta ni amalapo nno. Hiyo nimphavela Muttetthe.

²¹ Ntoko saalavulaaka voosiis'ula otapernakulu wa Munna Fuller, mwaha wa Osuulu w'Omwene. Vano, nyuwo mwakhalana ikaravatooro, miyo nkinihimyaka. Masi yaahikhala etthu yaakhumelenle voosiis'ula, wira miyo...Mwakhalana ekaravatooro, mwaphwanya emosa wa ifiita, kookupali wira enimoosivelani. Munna Maguire ohaana, ni *Osuulu w'Omwene Wa Abrahamu*.

²² Moone, osuulu w'Abrahamu aari Isakhi, yoowo okhanle muYuta, eephattu. Masi Osuulu w'Omwene aari Kristu, mwa natiri, ni wira Kristu aari Masu a Muluku owooniheriwa. Ni eri mmurimani mwahu olelo okathi hiyo...“Miyo...Nyuwo mwakhala mwa Miyo, nave Masu Aka mwa nyuwo, vano nvekeleke etthu entthunaanyu, nto munimwiireliwa.”

²³ Vano, miyo koohimya, ya oPhoenix, imaara sinci-ene okhuma okathi oryaaka wenco...Okathi aka woopacerya orwa waari miyaakha miloko miraru ni mithanu sivinre. Ni kaakhala ephiro 16 ni Henshaw, kaavara muteko, Ematta Circle R nno, oWickenburg. Ni kaaneettaka ni mwaaruusi mmosa iwe o 16 ni Henshaw. Kaahirowa ophavela nipuro nene nihiku nlo, ni hata khanihiyo-tho Henshaw. Vano ti Buckeye. Ni epooma yuulupale nipuro nuulupale na oPhoenix nno. Itthu sothene soorukunuwa.

²⁴ Nto amwaar'aka ni miyo naawela Mwaako South, wira niwehe oPhoenix. Miyo kuupuwela, miyaakha soophiyaka imiya tthaaru khalayi, alakela khiyaakhanle etthu nno woohikhala, akhwatte, ekosa, ni siiso. Nto vano olelo epooma yuulupale ya mihakhu. Vano, miyo khwira, “Oophentiwa, eyo eroorukunxiwa wala ohononiwa? Nyuwo muthanle. Wa miyo, eroohononiwa vano. Okhala wira, ipa iya suulupale ni soopakiwa sooreera saamukhala saana vaakhanle wira alopwana n'athiyana yaamweetta nno ni nno mphironi, ni matat'aya evenxenrye Muluku, emuttotopelaka Muluku, ni ekhalaka ntoko axinna alopwana n'athiyana; ohiya owurya, omweetta cuuku, onvura sikaro, wootha, wiiya, ipaare, itthu sothene sikhanel sootakhala. Eriyari ya sothene iyo, nnya...”

Vano amwaar'aka khukiirela, “Vano, Billy, mukhalenle-ni wenco?”

²⁵ Miyo khwira, “Masi, oophentiwa, okhuma okathi nikilaanthe ahu va, minuutu muloko ni mithanu, itthu kavi soowootha sihimmwe vakhatoni vale? Vaara vakavi olapha wiiriwaaya, mwa Nsina n'Apwiya veethiru? Asikaro akavi, iwureryo kavi sa wiskhi, mararuwo makavi yiiriwe, ni sothene iwe, okathi vakhani paahi wookiserya, niry'ene vaava?”

Awo khwira, “Eyo kahi yoowoopiha?”

²⁶ Masi miyo khwira, “Ela t’itthu ekhalenlyaahu va, oophentiwa. Mavekela makavi oororomeleya awenle okhuma okathi oryaahu va? ‘Nyuwo mwa Waarya wa mulaponi.’ Ti yeeyo ekhalenlyaahu va, wira nihele makhata ahu ni ikereja iya sikhaani nno, wira sothene sinweryaahu, wira nikhaliherye okelela ohoolo. Wira nikhale e . . .”

²⁷ Nyuwo othene, nyuwo masantu, mwa eparakha wa miyo. Kinroromela wira kinookhala eparakha wa nyuwo, mwaha wo oxekurya wenno. Ni miyo, voonalyaaka wira kaamuwerya othotola miromolelo soohiyana-hiyana ni mitthenkeso, ni—ni ikereja soohiyana-hiyana, ni sikina, axinn’aka okhatoni w’Phoenix nno, murim’aka waahitteeliwa. Eyo enrowa okhala ohinatthi muthukumano onrowaaka olavula, omuthukumanoni w’Alipa a Nakoso aKristu, kinoona wira, woolyaani wa voosiisu Saapatu, vano nto muthukumano wa Ttiminku oxekuwa, wira othhare, Ettiminku ele yoothharelana. Ni kweekwe oreeriwa othukumana n’axinna ale. Kinoona wira aakhalana mapuro oophiyaka ikonto piili ni imiya thanu iwe. Onookhala opuro munci-ene w’okilaathi wa hiyo othene. Ni ninniwehererya okumana ni nyuwo weiwo.

²⁸ Vano nto okhalana okathi ula wo opatthana, wira nirowe ekereja ni ekereja, ni olavula. Kinoona wira koolaleerya voosiis’ula mpakha okilala vammilo, voophiyaka ewoora emosa ni nuusu. Ni owo waari vakhani. Voolimaleleya nkinikhuma mpakha iwoora tthaaru wala xexe, o—okereja owaani. Miyo paahi . . . Miyo nkihiyo mulaleyi. Tivo miyo—miyo kinoonyakula paahi voohakalala w’Apwiya. Vannikisivela saana wira. Miyo—miyo kinoona wira onnikisivela, tivo miyo kinikhala kairaka paahi. Miyo kaari . . . koolavula vara vaxexe wala vathanu voovirikana kaapishaka athhu, tivo koosuwela wira eyo ekeekhaii. Nto ohiy’ula, vaxariya-vo, ninookhuma va ehinatthi oruma ewoora emosa. Miyo, kinimoolipiheryani. Miyo paahi, kaahalela . . . Moonelo mmosa wa erooho yooreera, ni sothene soophenteya saana, kookupali wira Erooho Yoowaarya enookhalana eparakha wa hiyo.

²⁹ Vano, vano miyo nkinkhalanaka miteko s’ovoniha mmithukumanoni. Miyo . . . Ohiyu umosa, weiwo munna . . . Nsina na Yesu, ti pani aari pastore? Munna Outlaw. Ekereja ya Munna Outlaw, yaahikhala anci-ene iwe yaathuna ovekeleliwa. Ni kaahimuleela mwan’aka wira akawe ittikitti sa mavekelo kamosa-kamosa. Vano ohiyu kamosa-kamosa, Erooho Yoowaarya yaahikhuruwelaxa mpaani, mpakha . . . Nyuwo othene moosuwela. Nyuwo munnikhhalaka mmithukumanoni mwaka. Nyuwo othene. Munnoonaka moota olamula sa mmurimani, ni sikina. Masi vano kinnoona wira annithukumana anci-ene wira evekeleliwe. Ni kaahiweha eyo woopaceryani, naapaceryaka Namararu ni Namathanu. Kuupuwela olipelela

mpakha nuuvira Ttiminku, okhala wira mwaakhalanaka miteko so ovoniha mukereja . . .

³⁰ Moone, miyo—miyo kaahihimya mapuro othene kaarowaaka wira khula mutthu akhale voopuroni vawe va muteko Ttiminku, moone. Mithukumano iya soosuwanyeya ti so waathotola axinna paahi. Ni hiyo—hiyo ninthuna wira atthu othene ekhaleke voopuroni vava va muteko, okhala wira pastore anyu onimoolipelelani, ni ti vaavo murinaanyu okhalaka.

³¹ Vano nto—nto kinoona wira, meelo ohiyu, Apwiya yatthuna vale, nki. . .Ninrowa okhala vayi meelo ohiyu? [Munna mmosa oniira, “oTempe wu, okereja wa Munna O’Donnell.”—Mol.] Munna O’Donnell, oTempe, Arizona. Vano, nyuwo mwaahikhalane e—etthu y’omeekha enrowa wiiraneya okereja wanyu, ni mukhalana atthu anwereiwa, vano, kinrowa waavekelela aretta, meelo ohiyu, okhalana eliinya ya mavekelo voolimaleleya paahi, waavekelela aretta, khino—khino Sekunta, Namaili. Nrowe noone, kihaana. . .Miyo ka. . .Oh, kihaana. . . Kihaana muteko wo okokhorela wa Namararu ohiyu nave? [“Ayo.”] Namararu ohiyu. Vano eyo. . .

³² Vano ompacerya Namathanu, ti siiso, muthukumano? [Munna mmosa oniira, “Miyo ntoko kirina itthu. . .?. . .”—Mol.] Vaareera, munna. Owo onoohimya naanaano. [“Moone, hiyo nri va ohiy’ula. Nto meelo ohiyu ninrowa okhala wAsempeleya a Muluku oTempe. Nuumala oMountain View oSunnyslope mahiku yeettaka miloko miili ni mararu. Nuumala wAsempeleya Senteraale mahiku yeettaka miloko miili ni maxexe.”] Vaareera, ti yooreera. [“Nkaawerya wuupuwela, yoomi. Mwa enamuna emosa kaahiitepanya ni yeeyo.”] Muhicale yeeyo.

Miyo kaalavula nihiku nlo, mwaha wa, “Ohiwerya wuupuwela.”

³³ Nto Munna Jack Moore khukiirela, khwira, “Munuupuwela wira murootepa?” owo khuhimya.

³⁴ Miyo khwira, “Munna Jack, miyo kinookhala kilavulaka, khuhinawerya wuupuwela etthu kaahimyaaka.”

³⁵ Owo khwira, “Muhuupuwele wira ti vootepa.” Khwira, “Kinoomuttapunya telefooni, omulikarela mutthu, kiniira, ‘Mwaatthuna-ni?’” Ahe, eyo ti vootepa! . . .?. . .Oh!

³⁶ Vano, wulu, eyo pooti wiiweya ntoko eperwa, yeeyo kihinooonaaka wira ti yooreerela ohimya vapulpitu va. Masi aana a Muluku aana ootteeliwa murima tu, khula enamuna, nyuwo moosuwela, tivo hiyo—hiyo enninisivela tu. Miyo koono wira eyo yaari etthu yooreera.

³⁷ Nyuwo othene, anci-ene a nyuwo, munnimusuwela Munna Jack Moore. Owo t’a oShreveport, Louisiana, oTapernakulu Ekumi, munna mmosa ooreera murima saana. Nto vano owo aakihimeerya yeeyo. Owo namateka, nave.

38 Owo khwira, “Muhuupuwele wira ti yoonanara, Munna Branham.” Khwira, “Miyo kaahimulikarella mutthu nihiku nlo, khuttapunya nummeru naya.” Nto khwira, “Awo khwaakhula, khwira, ‘Sayi.’ Miyo khwira, ‘Ahe, muntthuna exeeni?’”

Miyo khuupuwela, “Ahe, eyo yootepaxa, Munna Jack.”

39 Tivo vano, kinoona wira yaamukhala yooreera, ni apatthani ala antthuna ovekeleliwa, ni waaruuha athu aya aretta, nto hiyo ninimwaavekelela.

40 Vano, ohiy’ula, miyo kihuupuwela etthu kaarowaaka ohimya ohiy’ula va ekereja ela yaamukhaani yoophenteya. Miyo kuupuwenle, “Ahe, nkisuwenle.” Miyo kihaana okuxa yoosoma yaamukhaani, ni kinroromela wira Apwiya anoolikaniha moolumo mwa okathi uwo, ni otthuniherya omorela nipuro anrowaaya omukhaliherya mutthu. Wira ekhale. . . Miyo nkineereryaka othanla yoosoma, kweekwe kimpavelaka woona weettiheriwa, n’ulepa eyaattelo khata ya Soolempwa, ni sikina. Nto—nto vano, Apwiya yeettiherya voovirikana, vano miyo kinrowa paahi ntoko Awo aneettiheryaaya. Ni kinoona wira eyo t’namuna vaatthuneya hiyo wira. Ankhi nyuwo? Wira enamuna emosaru.

41 Nto vano yookhala etthu emosa eni—yeeyo miyo—miyo kintthunaaka, khula mutthu a mukereja kinihimeerya ela wa khula erutthu va vaavo. Nto eyo ti wii, wira vakhala. . . Mwamala onvekelela pastore anyu n’ale ophentiwa anyu, muhikiliyale, okhala wira kinnisuwela, nihiku ti nihiku, ovikana vahinatoko aka, wira ninrwa woomalelani w’ephiro.

42 Ni kinoomalaru waavitha ame aka, isumana vakhani sivinre. Ni kaahaavarela mmoononi mwaka mpakha Muluku oroiha ephumu aya ni munepa aya Wirimu. Miyo kaahiweha okhwa iwe woominyala wa muthiyana oosareya Erooho Yoowaarya, ni omoona ophiyaka wookiseryani w’ephiro. Miyo kuupuwela, “Oh, miyo—miyo kihaana okhalana khula maama siisaale. Miyo kihaana wira etthu wira kiphierye. . . wira enweryaaka, wira kiwiirihe athu woona etthu eyo enihimyaya vekeekhai.”

43 Nto, apatthani, miyo kookupali wira eyo khino ti yoowiixeryaxa. Ni kinoona wira hiyo ninkuxa vookhweyaxa ohiya ele ekhanly’aya vekeekhai. Kinoona wira nihaana wuupuwela. Vakhala wira Muluku t’owaaryaxa mpakha Malaikha ankhalaya ntoko oonanara vamaithoni Vawe, hiyo ninooneya sayi? Munnona? Ti yeeyo. Tivo hiyo nintthuna nuupuwele. Ni muupuwele, Muluku ori wu wa Ohimala, onaarya ovikana masuwa othene ni ekhalelo ya nsuwa. “Oowaarya, oowaarya, oowaarya,” Malaikha ni mapupha owiitho waya, ni inawu saya, evavasaka Ohoolo Wawe, ekhuwelaka, “Oowarya.” Exeeni yaatthuneya hiyo okhala? Vano hiyo. . . Ti yeeyo emphavelaahu wira.

44 Ni—ni miyo kinoona ntoko wira ela, Omwene wa Muluku, ori ntoko mutthu aakunxe ntthavi khurowa opahari, Yesu ohimnye wira, khurihela mmaasini. Nto vapurunlyaaawe, owo aahikumiha mithinto sinci-ene. Masi ihopa sooreera, tthiri, saahipwehiwa; nto ihopa sikina sooluma saatthikenle mmaasini, ntoko mwiikhampa, ni—ni inowa, anaakhwiitti, akasa, ni sikina. Masi ntthavi na Ehapari yooreera ninvara sothene. Ni hiyo. . . Nihiku nlo onoophiya okathi onrowaahu oriha ntthavi nahu nookiserya, Munna Adams. Ti yeeyo. Khamuhiyo nyuwo wala miyo ninihimya ele ekhanle ehopa ni ele ehikhanle. Hiyo khanisuwenle. Hiyo ninriha ntthavi paahi n'upurula. Ti yeeyo tu. Muluku onnaasuwela Awawe. "Ale Owo aasuwenlyaaawe khalayi ene, Owo oowitthana; n'ale Owo owiitthannaawe, Owo ohaakhaliha anaxariya; ni ale Owo aakhalinhaawe anaxariya, Owo ohaavuwiha." Vano hiyo ninoolipelela, ninriha ntthavi paahi. Ni ti mureerelo aka ohiy'ula weemela mukereja mwa Munna Edmonds va wira kikhaliherye oriha ntthavi nipuro nla, wira noone sinto sookhala ihopa Muluku orinaawe sa Omwene Awe.

45 Vano, nihinatthi osoma Masu, nrowe nilavule ni Mwaneene Masu okathi vakhani paahi nuuramihaka muru.

46 Ni muru ahu woowuurama, mwa owaarya wa okathi ula, ninaattamelaahu Masu a Muluku mukumi, okhanle Muluku, kinniikoha yaakhanle-ene atthu va arina soovekela mmurimani mwaya, yaatthuna wira yuupuweliwe mmavekeloni mu. Eswelihe evenxaka ntata.

Pwiya Yesu, nwehe vamuthukumanoni, musuwelaka khula murima.

Kooxukhuru.

47 Muluku ooreera murima ni oowaarya, Oowerya sothene, El Shaddai, aamukhumelenle Abrahamu mwa Nsina na "Oowerya sothene, Muluku a mapele, Nanvaha ikuru, Namwaalipiha ale ootteettheya," murwe wa hiyo ohiy'ula, Tithi. Ni ninnisuwela sootteettheya sahu ni soovonya sahu. Ninnilapa itampi sahu ohoolo Wanyu, ni ohela valtaari a Eporonse a olumula, ni ninvekela wira Ephome ya Yesu Kristu ekumihe, mwa mukuttho hiyo nimpakaahu. Munivahe, O Muluku.

48 Hiyo ninnivahererya ikumi sahu ni sothene sirinaahu, ni erattelo yaamukhaani nivahiwaahu. Pwiya, murumeele yeeyo wa ovuwa wa Muluku.

49 Mureerihe ekerej'ela, pastore aya oophenteya, matiyaakono, maatiministratoore, ni nikhuru nothene, ni khula mempuru onvolowa mukereja mu eniitthaniwa "Opatthana." Muluku, miyo kinvekela wira alopwana n'athiyana, yaavolowaka mukhor'ole wa nipuro nla, awo emorele vathi va ikupalelo mwaha wa erumelo yoophenteya ya Erooho Yoowaarya mpaani mu. Munivahe, Pwiya.

⁵⁰ Mulevelele itampi sahu, ni soottheka sahu, hiyo ninnivekela-tho. Nwuupuwele ale avenxale matat'aya. Vathi va ntata nlo, Pwiya, wookhala murima onoovekelani etthu Nyuwo, ni khino alakela Nyuwo paahi munwerya ovaha. Miyo kinvekela wira Nyuwo munivahe, Tithi. Etthu p'itthu awo amphavelaaya, mwaavahe voowaatta. Yakhala aretta, Pwiya, mwaavonihe. Akhala ommorela okerekhere wa ephiro, munvahe ikuru, nikutha nlo nintteetheya. "Mutathi woonyakattiwa, Owo khoninta, wala eliinyu entthuwa mwiixi Owo khonttipiha." Ni hiyo noosuwela wira Owo khonkhalakhala okhoottaka mutathi woonyakattiwa; Owo onimookolela. Nto miyo kinnivekela, Tithi a Wirimu, yaakhanle-ene irooho soowiiniwa murima, wala—wala soowoceya, wala matata ootteetheya ammora, ni makutha oonyoonyiwa, awo avenxiwe ohiy'ula, Pwiya. Erooho Yoowaarya erwe ni evonihe mirima sahu ni irooho, ni mukhalelo ahu w'erutthu, nto hiyo ninoonvaha Yoowo ovuwa wothene mwaha wa yeeyo. Hiyo ninvekela mwa Nsina na Yesu. Amen.

⁵¹ Mwatthuna vale okhunla Yoolempwa, wira nilavule minuutu soophiyaka miloko miraru paahi, kaatthuna wira musome ni miyo muliivuruni mwa Wiisuupulula, kapiitulu 19. Ni kaatthuna kisome mpakha versiikulu 7, nave.

Numala itthu iya kaahiiwa nsu nuulupale na muttitthi muulupale wirimu, niiraka, Aleluya; Woopowa, . . . ovuwa, ni nttittimiho, ni owerya, ti wa Apwiya Muluku ahu:

Okhala wira olamula waya ti wa ekeekhai ni exariya: tthiri awo aamphuka muthiyana namararuwa muulupale, yoowo aahonona elapo ni oraruwa wawe, ni aamunlela ikuhu sa ephome yarumeyi aya mmatatani mw'awe.

Yaahitthikela-tho wira, Aleluya. Ni mwiixi awe onniwela mahiku othene.

Vano mahumu miloko miili ni maxexe ni axinama axexe yaahuurama mpakha vathi emukokhorelaka Muluku aakilaanthe veehicensi, yiiraka, Amen; Aleluya.

Vano naahikhuma nsu veehicensi, niiraka, Mmuttotopeleke Muluku ahu, nyuwo arumeyi awe othene, ni nyuwo munimoova yoowo, akhaani ni aalupale.

Nto kaahiiwa nsu ntoko na muttitthi muulupale, ni ntoko oruma wa maasi manci-ene, ni ntoko oruma wa itari suulupale, niiraka, Aleluya: nto Apwiya Muluku oowerya sothene tari Mwene.

Nitthapeke nitteeliweke murima, ni naattotopeleke yaawo: okhala wira othela wa mwaapwittipwitthi onnaattamela, ni amwaar'awe ahiilokiherya.

⁵² Kaatthuna kilavule ohiy'ula mwaha wa: *Othela Wa Mwaapwittipwitthi*, okathi vakhani paahi wira...Hiyo ninnisuwela saana Yoolempwa ela. Vekeekhai pastore anyu oophenteya va oolavula mwaha yoola imaara sinci-ene.

⁵³ Ni, wa yeeyo, hiyo noosuwela wira onookhala Mwaakameliwa, ni ninoorowa okhala niira n'othelana ninrowa opakiwa wirimu. Ti yoolipaneyaxa wira ninookhala, siiso Muluku okhanlyaaawe, okhala wira awo Masu Awe. Ni hiyo noosuwela wira ale anrowa ompaka Mwaakameliwa owo enrowa okhala Ekereja Awe, ni awo anrowa okhumelela ohoolo Wawe ehirina nlepa wala ninnyaari. Vano awo aakhalana ikaruma elapo ya vathi naanaano wira yiilokiherye. Mwaweha vale, ehimmye wira, "Owo ohiilokiherya."

⁵⁴ Anci-ene aniira, "Apwiya yakumiha-ru erooho ela yootakhala mwa miyo, ya owurya, wala omweetta cuuku, wala wootha, wala wiiya, miyo kinimwaarumeela Awo."

⁵⁵ Masi owo mwaha anyu. Moone, ni nyuwo muhaana wira, etthu. "Ale anrowa oxintta anoohiyeriwa itthu sothene." Ale anrowa oxintta. Mookhalana owerya wo wira, masi muhaana otthuna ohiya eyo. Munnona? "Owo ohiilokiherya." Okisivela Masu awo.

⁵⁶ Moone, Muluku khaakhanle onisukhumelaka ovira mumpompeni mwaamukhaani, onanikumiha wookiseryani okina, vano nto wira, "Ooreeriwa t'ule onxintta." Khimwaarowa okhalana etthu wira muxintte; Owo orimoosukhumani paahi. Masi muhaana wira ithanlelo mmansinyu. Miyo kihaana wira ithanlelo mmansaka. Niiraka yeeyo, hiyo ninooniherya waamini wahu ni nttittimiho wa Muluku.

⁵⁷ Abrahamu aahilaiheriwa mwaana, masi owo aahaana omusuka natiri ula miyaakha miloko miili ni mithanu, sa osulu ni vathi owo aarinaawe, ni ottehattehiwa, mwa miyaakha iye miloko miili ni mithanu. Masi owo aahilipana masu a natiri.

⁵⁸ Ni Isarayeli aalaiheriwe muttethe wa natiri, masi awo yaahaana owanela khula esentiimeturu aya. "Mapuro othene maravulo a inawu sanyu anrowaaya onyakela, Miyo kihoovahani" Muluku aamuhimenrye Yoxuwa. Sothene saari vaavale. Muttethe waari vaavale, ni Muluku aahaavaha, masi awo yaahaana owanela yoowo.

⁵⁹ Ti siiso eryaaya ni ovoniha wa Muluku. Muluku ookhalana owerya wo woovonihani, mwakhalana-ru ominyala wira mwaakhele, masi munrowa owanela khula esentiimeturu y'ephiro.

⁶⁰ Muluku ookhalana mahala maalupalexa wira owoopoleni, ni Owo onimwiira, masi nyuwo munoorowa owanela khula esentiimeturu y'ephiro anyu.

⁶¹ Miyo kinnikhalaka wiithela w'epulpitu, mwa miyaakha miloko miraru ni mmosa, ni khula esentiimetru ya yeeyo enkhalaka ekhotto, voohiyererya. Vekeekhai t'enkhalakaaya.

⁶² "Masi nihaana owana vakhala wira nihaana oruma." Tivo ninnoona wira Mwaakameliwa ohaana wiilokiherya. "Othuna ohiya soolemela sothene sinnirukurerya vakhiviru, wira nitthimakele n'uvilela muteko nileeliwaahu." Nihaana ohiya iyo epantte aya, yoohi. Hiyo khanikhanle wiiraka, "Muluku, Nyuwo murwe, munirule itthu iya hiyo." Hiyo nihaana wira yeeyo, mmansihu.

⁶³ Vano, okisivela wuupuwela othelana. Kinnikhalanaka oreeriwa wo waatheliha athu anci-ene. Ni kinoona wira, kaamuruuhaka mmiravo ni mwali mmosa mpakha waltaari, ni owoona erwaasaka okereja; ni owo, ooreera ni evestiitu awe ya wootheliwani, ni ewewu enimorela wiitho wawe; vano mutheli, eemenle, owanre-ene saana; mmiravo ni oowaatta ikuru, erwaasaka yeettaka vale vooreeraxa wa ekumi aya, ni omwiira natiri ule a othelana, kinoona wira yookhala etthu yoosivela mwa yeeyo. Yookhala etthu yooreerhiwa, okhala wira eyo ennukuupuxerya wira onookhala othelana okina wuulupale nihiku nlo, okathi Mwaakameliwa a Kristu onrowaawe orwa eettaka aviraka munvireloni sa Movuwani.

⁶⁴ Mutheli onrowa okhalana sothene soolikana. Onookhala othelana ni olya. Moota onnisivelaaya wuupuwela wira ninrowa okilaathi vameesa niwehanaka mmosa ni mukhwaawe, ni ovahana matata mmosa ni mukhwaawe, nto maithori emoraka mmalakuni mwahu. Ni wuupuwela, Owo onimoorwa, uukutthe maithori othene mmaithoni mwahu, aire, "Muhinle. Sothene soomala vano. Nvoloweke moopuhani mw'Apwiya mutthokiheriw'anyu okhuma opattuxiwaka-ru olumwenku." Oh, munna, eyo enorowa onikhaliha oophentanaxa mmosa ni mukhwaawe.

⁶⁵ Kinoona wira eyo t'eniireya ni Ekereja, Mwaakameliwa olelo, onipakeya ni ikereja sothene sinimwaamini Kristu. Kehiyo empa y'ekereja, nnakhala mutthenkeso wala muromolelo, masi t'athu v'omeekha ari mukereja animukhaliha Mwaakameliwa.

⁶⁶ Kookhalana mpatthani mmosa ooreera murima oLouisville, Kentucky, Dr. Wallace Cauble, yoowo aari murumeyi a Ekereja ya Kristu, khurwa khwaakhela Erooho Yoowaarya, ni onrumeela emosa wa ikereja, suulupalexsa sa oLouisville, ekereja ya Mukhora Wootthukuwa. Owo onnikhalaka mpatthani oophwanelaxa wa miyo. Nto mahiku vakhani avinre, miyo keemenle mphironi, vano kaahimoono owo orwaaka mphironi. Ni miyo kweekwe kinnimphenta, ni owo onnikiphenta.

⁶⁷ Masi nihiku nimosa owo aarina operasawu wa naalokholokho, ni aamookhwa mwaha wo ovuuva ephome. Ni awo jaarina owo Oxipiritaali Yosefe Oowaarya wu,

ni khuhimya wira aamookhwa. Nto muhano McSpadden khukiihana, khwira, “Dr. Wallace Cauble.” Miyo nkaamusuwela nlelo, masi kaanusuwela wira yaahikhala ekereja yuulupale ya Mukhora Wootthukuwa. Khwira, “Owo onookhwa. Mameetiku aamuhoma ixasawu, sothene sikina. Ni aamuttottha. Owo onvuuva ephome voohihyererya, ni khanwerya oxeiha ephome. Ephome awe khentikana, ni, moosuwela, oxeiha ephome.” Ni khwira, “Awo aakhalana mamisisyonaariyu iwe, ni antthuna wira murwe, munvekelele.”

⁶⁸ Ahe, miyo kaahiiwa sa Dr. Wallace Cauble, ni siiso miyo kaahikhala oohitthuna vakhani, masi khurowa. Nto vawehalayaaka musaala wa oxipiritaali, yaahikhala mamisisyonaariyu ni arumeyi aalupale, othene mwemmwe, yinlaka ni evekelaka. Nto miyo kuupuwela, “Oh, wulu! Mwaamukhaani miyo, santu oophirikeya mwaamukhaani, ovolowa mmwe? Vanreerela kikhale vate va.” Vano miyo kikokhora wiithela wa maakina a Koka-kola vate vale munvireloni. Miyo khunvekela Muluku, wira—wira axeihe ephome, wa Munna Cauble. Miyo khutthikela vathi khurowa.

⁶⁹ Kaammala—ru ophiya owaani, minuutu soophiyaka muloko ni mithanu, vano telefooni khuruma—tho, nto yaatthuna osuwela etthu yaakipisinhe, kahaakhalenyaaka weiwe. Nto miyo khwira, “Miyo—miyo kaahirowa. Masi yaarookhala anci-ene mmwe. Miyo—miyo vekeekhai nkoonale weettiheriwa wira kivolowe, khino, moone, anci-ene, arumeyi oosuwanyeya mmwe.”

⁷⁰ Vano owo khwira, “Murwe naanaano va.” Khwira, “Mulopwan’owo khokhanle okhalaka—tho mukumi okathi vakhani.”

⁷¹ Vano miyo khutthikela—wo, tho. Nto vavolonwaaka mmwe, owo aaphavela omwiiriha munna mmosa muthiyana muKatolika wira amukupali Kristu okhala Moopoli awe; ni owo aavuuva ephome, nto ephome etuphaka mwaano mwawe. Miyo khuvolowa.

Nto owo khwira, “Ehaali anyu?”

⁷² Ni miyo khwira, “Ehaali anyu?” Owo aakilaanthe voolilini, ni akothomolaka siisaale, ni ephome ekhumaka.

Nto owo khwira, “Nsina nanyu ti pani?”

Nto miyo khwira, “Miyo ka Munna Branham.”

⁷³ Vano owo khupacerya wunla, khukipatikha. Kikokhora vaavale.

⁷⁴ Vano, ti Dr. Wallace Cauble, a ekereja Mukhora Wootthukuwa oLousville. Munveleeliherye ewarakha. “Ephome khuxeya okathi ene yoowo.” Khuhikhuma, okhuma vaavo. Munnona? Nto hiyo khanireere okhala, apatthani ooreerela

saana okhuma vaavo. Nto nihiku nlo, miyo kaahikumana ni yoowo. Nto owo khwira . . .

⁷⁵ Oswald J. Smith, anci-ene a nyuwo munnimusuwela Munna Smith. Owo misiyonaariyu muulupale, ni owo onnirwaaka wa Munna Cauble, okhala wira owo onnimusivela saana. Owo khwira, “Munna Cauble, moosuwela,” owo khwira, “Miyo. . .” Etthu mwaha w’amwaar’awe. Owo khwira, “Kimalaka-ru othela,” khwira, “Kaanuupuwela ntoko, ahe, kavonya vale, kino, oh, kinoowerya omphwanya mukina,” okhala wira owo aari mmiravo. “Masi,” khwira, “vanrwaasaaya aana,” khwira, “vano ti yoorika miyo ohikhala ni yoowo. Vano vamphiyaanyu miyaakha soophiyaka miloko mithanu, khimunwerya ohikhala ni yoowo. Nto mwaatepaka wuuluvala, vano, nyuwo—nyuwo munoona siiso.”

Miyo khwira, “Kinoona wira eyo ti yoolikana.” Miyo kaari. . .

⁷⁶ Niphiyenrye mwaha owo okhala wira, nyuwo moosuwela moota athiyana anweryaaya othuma itthu, ni amwaar’aka yaari mpaani mmwe. Ni awo apwiyamwene a yothene eyo. Awo anookhala mmwe okathi wothene. Inawu saka soohaawaseya sinnihalela okiiva, mphironi weetta nno ni nno kaaveleelaka. Nto owo aamukileela, iira, “Ahe, nyuwo khamunwerya ohikhala ni yaawo.” Nto ti siiso yoohimya epacenryaaya.

⁷⁷ Varonwaaka owaani, kaahikilaathi okatthi iwe, kitthokelelaka, “Ti yeeyo.” Kaahelenle etthu ekina.

⁷⁸ Moosuwela, kimalakaru orukunxa murima mu. . . khukhala mulaleyi muPatista Misiyonaariyu, miyo kaanuupuwelaka, “Mutthu ahaakhanle muPatista, owo khooponwe paahi. Ti yeeyo tu yaakhanle.” Ni kaanimukuxaka Bibilia vathi va moonno aka, ni kuupuwela wira Apwiya yaakiitthanenle wira kaakhalihe atthu othene aPatista. “Ni wira othene ale yahaamini ntoko aPatista saamini aya, awo khiyaarina muteko nnakhala.”

⁷⁹ Vavinryaaya okathi, koono wira muteko wothene waari wawaka, yoomi. Nto kiphiyerya osuwela, miyo khunweha munna mukina aarina ekereja, pastore. Owo aanilipihya vanci-ene, ntoko miyo. Vookiserya, mukhumi onookoleleya wa yoowo vakhani nave, moosuwela.

⁸⁰ Vano nimpchwanya wira, ninniphavelana mmosa ni mukhw’awe. Nto vano, vamanlyahu okelela ohoolo mpakha va, ti yoorika mmosa okhala ohirina mukina. Ti yeeyo tu. Tthiri hiyo ninniphavelana mmosa ni mukhwaawe, mwa yeeyo. Ni miyo kinnaamini wira ti siiso mmweetteloni ula muulupale wa pentekosite. Onnikisivela woona mikaano iyo sa ivirikanelo opwexakasiwa, Ekereja yuulupale ya Muluku epaceryaka wiiraana vamosa mwa opatthana. Enihimya wira othelana onnaattamela vano. Ni maluku t’othikiliwa voomeekha

sikhanlyaaya othikiliwaka, awo aakhalana opuro nipuro nlo mwa etekelo eyo, awo yakhalaru maluku a Apwiya.

⁸¹ Vano, othelana, mwa moonelo mmosa, ethoonyeryo. Othelana wa vathi va ti ethoonyeryo ya othelana wa wirimu. Vano nrowe nuuluule yeeyo, okathi vakhani paahi, wira nisome okathi vakhani.

⁸² Etthu yoopacerya ekhanle, ehaana okhala ethanlelo eniiriwa. Etthu yoopacerya, entthuneya, mwa othelana wa mw'erutthuni, wira ethanlelo ehaana wiiriwa. Mwali ohaana wira ethanlelo awe, vakhala wira onnimutthuna mmirav'ola; ni mmiravo, vakhala wira onnimutthuna mwali uwo. Ehaana okhala ethanlelo eniiriwa, ni muhaana wira. Owo ohaana okhala muthiyana mmosa paahi molumwenkuni munimphentaanyu, ni owo ohaana okhala mulopwana mmosa paahi. Vaahikhale siiso, weeso khimuthanlale vooreera.

⁸³ Ni ti siiso oniiriwaaya othanla mwaha wa Kristu. Etthu yoopacerya nurinaanyu wira, olakela vakhala wira munoorowa omurumeela Muluku ni omukupali Yoowo okhala Moopoli anyu, wala vakhala wira khamunrowa wira. Munrowa orumeela olumwenku? Munrowa omurumeela Kristu? Muhaana olakela. Ehaana okhala ethanlelo eniiriwa. Nyuwo mwaalakelaka, wira munrowa omurumeela Muluku wala mamoni, vano nyuwo munoothanla. Masi othanla ohaana wiiriwa.

⁸⁴ Vano nto, vammalaaya wiiriwa ethanlelo, wira munimwiira, nto onrwa mulaiheryo. Eyo, eyo mumphwanya waltaari. Muhaana wira mulaiheryo wiiraana nno ohinatthi okhala. Ni ti siiso eryaaya ni Ekereja ya Kristu. Ohaana okhala mulaiheryo ni Kristu, e—elaphelo, mulaiheryo, wiiraana wa mphento.

⁸⁵ Vano nto, etthu enttharelana, t'a—t'ammaniwaaya anatiri. Ahaana okhala anatiri ammaniwa mmosa ni mukhwaawe, siiso nyuwo munimmanaanyu natiri. "Oophentiwa, mwathelana ni miyo, kinnoolaiheryani wira kinookhala oororomeleya ni eekeekhai. Nkinrowa onweha muthiyana mukina." Wala, "Miyo nkinrowa onweha mulopwana mukina. Ni kinimwiira sothene okhanle muteko, ntoko mwaara. Nakhhalana aana, inimwiiriwa sothene sikhanle muteko ntoko ma—ntoko maama. Miyo—miyo kinookhala namukhapelela etthoko." Anatiri ala othene ahaana wiiriwa, wala yaahaana okhala siiso, woothelanani woolikana.

⁸⁶ Ni eyo etthu emosaru okathi nyuwo munrwaanyu wa Kristu. "Pwiya, Nyuwo mwakaakhela-ru Momweneni mw'Anyu, miyo kinoomanelani natiri." Eyo vo. "Miyo kinimoophentani. Kinookhala oororomeleya wa Nyuwo. Kinimoorumeelani Nyuwo, othana n'uhiyu." Ti yoonanara hiyo oliyalaka eyo. "Kinimoorumeelani Nyuwo, othana n'uhiyu. Kinaamutthuka. Kinaanvekela. Miyo kinookhala oororomeleya wa Nyuwo. Kinaamuruuha sa namuloko saka mpaani mwa osuka. Miyo—miyo ki—miyo kinaanvekela, imaara sinci-ene khula nihiku.

Miyo ki—miyo kinaamwiira khula etthu. Ni kinimooniherya ophenta waka wothene wa Nyuwo.” Ti yeeyo murinaanyu wira. Eyo ekeekhai voolikana, wira munommuna natiri wa yeeyo, ni ehaana okhuma mmurimani mwanyu.

⁸⁷ Mwamulaiherya—ru iy’anyu yeeyo, ehikhumaka mmurimani mwanyu, muhihimyaka vaxariya, maramara khamunkhala voolikana ni yoowo. Eyo epatthanelo yoohelela ohoole.

⁸⁸ Nkawehani va. Mwa—mwaahikhalane maino, ni munarumeela maino oopakiwa, vano, eyo ti yoolikana. Anrantteliha maino mwaatonko anyu okhalana. Masi, vekeekhai, maino awo khaphitaanne ni nyuwo. Kahiyo epantte ya nyuwo. Mwaarina—mwaarina moonoo woothikiliwa, vano munahela moonoo woopakiwa, ahe, moonoo owo vekeekhai khophitaanne ni nyuwo. Orooheliwa—vo paahi. Munnona? Owo khophitaanne ni nyuwo.

⁸⁹ Nto hiyo naaivahereryaka wa Kristu, naahiphierye okhala mpantte wa Yoowo, ntoko muthiyana vantthuneyaawe okhala mpantte wa mulopwana ni mulopwana mpantte wa muthiyana, weeso n’aKristu oopakiwa. Vakeekhai, khanihiyo. Nyuwo vekeekhai khamuthelanne ni muthiyany’owo. Nyuwo pooti okhala ooromeleya. Mwaahaaphenteke aiy’anyu, ni awo arina miyaakha miloko mithanu na mosa wala miloko mithanu na miili, ni nyuwo khuhinaaphenta saana ntoko saaphentakaanyu wopaceryani, weeso vekeekhani munaalela an’aya paahi.

⁹⁰ Ti siiso ikereja siryaaya, sinci-ene olelo. Hiyo ninkuxa nsina na “Ekereja y’oKristu paahi,” noothereryaka okhala Mwaakameliwa. Eryeene, etthu yoopakiwa. Khanikhanle oophitaana ni Kristu mwa hata enamuna. Ninkhala ntoko niino noopakiwa, moonoo woopakiwa, niitho noopakiwa. Munnona? Eyo etthu ekhanle yoopakiwa vakhala—ru wira ninoohela paahi. Ahe, khimukhanle wiichelaka oKristu. Nyuwo muhaana ophitaana ni yoowo.

⁹¹ Vano nto ekereja ekhanle yoopakiwa paahi, eniitthaniwa ekereja ya Kristu, ahe, aana awo weeso khanakeleke Mmo, okhala wira ayariwe ni mutthenkeso yoowo mmosaru. Ari paahi. . . Awo kahiyo aana a Kristu. Awo aana a muromolelo, nave kahiyo aana a Kristu.

⁹² Muthiyana aahiphitaane ni mulopwana mwa oxariya, weeso kahiyo iy’awe. Owo mulopwana paahi ommanenlyaawe natiri paahi wira okhaleke ni yoowo, ni ommanne naitiri oovonyeya. Owo ommanne natiri wira onoomphenta, ni ohimmye wira aanimphenta, nave khiirale. Okathi wothene, mulopwan’owo arimootothiwa.

⁹³ Masi yookhala etthu y’ekeekhai, apatthani, khaninrowa omootooha Kristu. Owo onnaasuwela Awawe.

⁹⁴ Masi, moone, yoopacerya, ithanlelo wiiriwa. Nuumala, elaihanero. Nuumala, natiri.

⁹⁵ Vano, nto, niira. Nto owo p'ukathi mwaakameliwa—mwaakameliwa onkuxaawe nsina na mutheli. Owo khorina-tho nsina nawe yoowo. Owo onkuxa nsina na mutheli.

⁹⁶ Vano nto okathi Ekereja enikhhalanaaya niira, enaahimyaaya anatiri aya, vano Eyo enikuxa Nsina na Mutheli. Vano Eyo kehiyo-tho ekereja ya molumwenkuni. Eyo Ekereja ya Pwiya Yesu Kristu. Amen. Kahi. . . Miyo nkinihimya, eyo, mwa nsina. Kিনিহਿમ્યા, eyo, mwa Oyariwa, ni mukhalelo, ni owerya wa Muluku. Ni Ekeekhai yowuupululiwa ya Muluku, mmurimani, Eyo eniphiyerya okhala Ekereja y'eKristu, Ekereja yuulupale y'oKristu y'arummwa ya mulaponi mothene. Eyo enkhala epantte ya Kristu. Eyo yaairaka yeeyo, Eyo. . . Kristu onkelihha mwa Yeeyo Erooho Awe Yoowo, Ekumi Awe yoowo. Ni Bibilia aamuhimenrye, Atamu ni Hawa, vale, "Nyuwo khamuhiyo-tho aili, masi mmosa." Nto okathi muthiyana, Ekereja, entheliwaaya ni Kristu, awo kahiyo-tho aili. Awo ankhala Mmosa. Kristu mwa nyuwo! Amen. Ti yeeyo. Ekumi Awe yookelihiwa mwa nyuwo, vano nyuwo munkhala Mwaakameliwa.

⁹⁷ Vano, etthu ekina, owo vammalaawe waamana anatiri ala othene, ni sikina, ni niira khuhimmwa:

⁹⁸ Ntoko, nsina n'amwaar'aka naari Broy ehinatthi otheliwa. Vano, awo kahiyo-tho Broy. Awo ti Branham. Vano, awo kahiyo-tho Broy. Awo ti Branham.

⁹⁹ Vano mwakela-ru mwa Kristu, khamuhiyo-tho a molumwenkuni. Nyuwo mwa a Kristu. Munnona? Nyuwo khamuncaliwa nto ni itthu sa molumwenkuni. Iyo sihookhwa wa nyuwo. "Okhala wira ole omphenta olumwenku, wala itthu sa molumwenkuni, ophenta wa Muluku hata khokhanle mwa yoowo."

¹⁰⁰ Tivo, moone, khimukhanle okhalaka muKristu oopakiwa. Nyuwo pooti ohimya okhala, muKristu oopakiwa.

¹⁰¹ Masi khivanweryaneya okhala muKristu, okhala oorukunxiwa, mpakha Kristu aikelihe Mmansawe, ni opatiiso wa Erooho Yoowaarya, mwa nyuwo. Vano nyuwo munoophitaana ni Yoowo. Nyuwo khamuhiyo-tho aili. Nyuwo mwa Mmosa. Kristu oolaiherya okhala mwa hiyo, ntoko Atithi yaaryaaya mwa Kristu. "Miyo n'Atithi Aka nri Mmosaru. Nyuwo ni Miyo nri Mmosaru." Munnona? Kristu mwa hiyo! Sothene Muluku aaryaawe, Owo oyeehenrye mwa Kristu. Ni sothene aari Kristu, oyeehenrye Mukereja, wira ekelelihe ohoolo muteko wa Ehapari yooreera.

¹⁰² Vano hiyo niniphiyerya okhala, kahi ni nsina noopakiwa, masi ni ekeekhai ya Erooho Yoowaarya ya Ekumi enniphitaaniha mwa Kristu. Nto, mwa owerya w'ohihimuwa Wawe, hiyo ninoohihimuxiwa mwa itthu sookhwa sa molumwenkuni, ni nikilaanthe ni Yoowo mapuro a Wirimu. Amen. Okisivela eyo. Ohiy'ula, nikilaanthe mapuro a Wirimu mwa Kristu Yesu,

moone, oohihimuxiwa vamosa ni Yoowo; ookhwa wa itthu sa molumwenkuni, ni noomwaakhela Kristu. Nto namwaakhela-ru Kristu, vano olumwenku ohookhwa, vano hiyo khanincaliwatho ni olumwenku. Olumwenku ti wookha wa hiyo. Ni hiyo nri. . . Ni owo ohookhwa wa hiyo, ni hiyo nihookhwa wa yoowo.

¹⁰³ Nyuwo mwa mutthu oovirikana, omutthu woovirikana, okhala wira nyuwo mwa yoopattuxiwa esya. Yoopattuxiwa! Kahi yoopattuxa emosaru, yookutthiwa; kahi mu—mutthu orukunxale nikukhu nsya. Masi mutthu okhwiye, ni khuyariwa vasya, nto khukhala yoopattuxiwa esya mwa Kristu Yesu, ni Erooho ya Muluku mukumi enkhalo mwa mutthu.

¹⁰⁴ Vano, enoolikana ni muthiyana ohikhanle-tho Broy, owo ti Branham, ni owo onkuxa nsina nenlo.

¹⁰⁵ Ni Ekereja kehiyo-tho ya molumwenkuni, masi eri mwa Nsina na Kristu, Eyo t'eryaaya. Eyo yoopaitaana ni Yoowo, ni Ekumi Awe Yoowo.

¹⁰⁶ Mootoko osoma mwa Soolempwa, mooto mutthu oopacerya, Muluku aampanke awe, aaryaawe mu—mutthu vaili? Atamu aari oowaili Atamu ni Hawa, olavula mwa erooho, masi okathi Owo ompanke awe mutthu oopacerya ailattanihaka Yoowo mwaneene. “Ni Muluku Erooho.” Masi, okathi Owo aahenlyawe mw'erutthuni, Owo aarimwaavalaaniha. Owo okunxe erooho y'olopwana, khuhela mwa mulopwana, khukuxa erooho y'othiyana khuhela mwa muthiyana.

¹⁰⁷ Vano, mwaamoonaka muthiyana onthhuna wira ntoko mulopwana, yookhala etthu ehilonke. Mwaamoonaka mulopwana onthhuna wira ntoko muthiyana, yookhala etthu ehilonke. Tivo enkhalo ntoko olumwenku wothene ti woohiloka, olelo. Alopwana aneererya wira ntoko athiyana; athiyana ntoko alopwana. Ti yeeyo. Eyo ekeekhaii.

¹⁰⁸ Vano nkawehani. Ti yooreera voomalela, wira okathi Muluku okunxe awe khumpaka mutthu, ni wira ooniherye wira Owo khaathhuna wira ekhale etthu yoovirikana, muthiyana khaakhanle moopattuxiwani moopacerya. Tivo owo khokhanle moopattuxiwani, masi owo epante ya Atamu. Owo epante yoopattuxiwa ekhumme mw'ekina. Owo onrowa epante y'Atamu, kahi wira opake yoopattuxiwa ekina, masi okunxe epante ya yoopattuxiwa khupaka yoopattuxiwa ekina mwa yeeyo. Vano Owo khukuxa erooho y'olopwana yaari mwa Atamu. . . Vano khukuxa erooho y'othiyana yaari mwa Atamu, kiireke, khuhela mwa muthiyana. Vano, soopiili erooho n'erutthu, awo khukhala mmosaru.

¹⁰⁹ Yaari ethonyero yooreera wa ele Muluku iiralyawe oKalvario. Owo omukunxe Kristu, khumphitaaniha ni Ekereja, ni niparari nookheriwa, Owo khuruuha Ephome enimurapiha mutthu, enreeriha erutthu ya Ekereja, ni enihela Erooho ya Muluku mukumi, Owo okuminhe awe vamwiikimanyo vale, mwa

Kristu, ni onhela mwa mutthu. Vano awo ankhalala mmosaru. Awo ankhalala mmosaru. Kristu ni nyuwo mwa mmosaru.

¹¹⁰ Ni nyuwo ni aiy'anyu mwaahaana okhala mmosaru. Yaakhanle-ene etthu yoovirikana, vano yookhala etthu ehilonke ni otakanxana wanyu.

¹¹¹ Nto yaakhanle-ene etthu yoovirikana ni hiyo, wa Kristu, wira hiyo khinnaamini Masu Awe, niniira, "Oh, eyo yaari ya mahiku makina," yookhala etthu ehilonke ni otakanxana wahu ni Yoowo. Nyuwo mwaairaka wira, "Mahiku a miiriirya aavira; khokhanle ovoniha wa Muluku; khokhanle opatiiso wa Erooho Yoowaarya," ohelela yeeyo nipuro nlo khalayi, eyo enooniherya wira Erooho ya Kristu khekhanle mwa nyuwo.

¹¹² Okhala wira, "Wopaceryani naari Nsu, nto Nsu naari ni Muluku, nave Nsu naari Muluku. Vano Nsu nihiipaka erutthu." Nto vo okathi Masu Awe ankhalaaaya oosuwanyeya mwa nyuwo, nto, moone, ti nyuwo ni Kristu munkhala mmosaru nto. "Nyuwo mwakhala mwa Miyo, nave Masu Aka mwa nyuwo, nvekeleke etthu entthunaanyu," okhala wira khamuhiyo-tho nyuwo. Awo Masu a Muluku, Kristu mwa nyuwo. Nyuwo munikhala mmosa. Vaareera.

¹¹³ Vano, etthu ekina, owo nuumala wira yeeyo, nuumala ommaliherya natiri awe, ni okupali otheliwa wawe, ni okupali wira nsina na aiy'awe ninookhala nawawe, nsina na mutheli, vano owo ti mulipa-oorithi itthu sothene owo orinaawe. Owo ti mulipa-oorithi itthu sothene. Amwaar'inyu t'akhanle mulipa-oorithi a sothene sirinaanyu.

¹¹⁴ Ni eyo ti ele ekhanle Ekereja, vaakhanle wira Eyo yaanisuwela paahi, ekhalaka mpantte wa Yoowo ni Erooho Awe mwa Yeeyo. Owo ohimye wira, "Miteko Miyo sinvaraaka nave-tho nyuwo munoovara. Suulupale ovikana iya nyuwo munoovara, maana Miyo kinrowa w'Atithi Aka. Woohala okathi vakhani, olumwenku khunrowa okoona-tho; masi nyuwo munoookoona, maana Miyo kinookhala ni nyuwo, hata mwa nyuwo, mpakha omala olumwenku." Vano ti Kristu mwa nyuwo. Nyuwo moophitaana vamosa, ni nyuwo mwa alipa-oorithi ni Yoowo.

¹¹⁵ Ni Owo aakhanle muumu elapo vathi, Owo aarowa wiiraka exeeni? Etthu emosaru Owo iiraly'awe wu, okhala wira Owo mmosaru nsana, olelo, ni mahiku othene. Owo aarowa okhala oocaliwa ni muteko w'Atithi. Owo aarowa waavonihaka aretta. Owo aarowa opakaka miiriirya. Owo aarowa wiiraka voolikana siiralyaawe okathi waaryaawe elapo ya vathi muumu, okhala wira Owo onkhala mmosaru nsana, olelo, ni mahiku othene. Eyo ti voolikana voomalela. Iwo t'okhanle othelana.

¹¹⁶ Masi, vano, anchi muthiyani'ola aatheliwa, onaakupali anatiri ala othene ni itthu sothene, ni owo onaphiyerya okhala a mulopwan'ola iya, ni mulipa-oorithi sothene owo

orinaawe, ni siiso, vano nto owo onakhala oohikasooa? Owo onakhuma n'upacerya opwapwasa. Onapacerya, waatthara alopwana akina. Kahi yeeyo paahi, masi onakawanya mphento awe n'akina. Mulopwana mmosa n'amwaar'awe, anatiri othene aahimmwa, nuumala owo khunakhuma onapacerya okawanya makhalelo awe n'akina, mphento awe ni esiveliwo awe n'akina.

¹¹⁷ Ti yeeyo anci-ene aniihaniwa aKristu aniiraaya, okawanya mphento anyu n'ulumwenku: muthweelaka, wiina, omweetta cuuku, okhala owaani ohirowa omuthukumanoni wa mavekelo, wira yooneke etelevisawu, inamuna sothene sa itthu sa molumwenkuni sikunxe nipuro na mphento wa Muluku, mmurimani mwa ekereja. Eyo yoorowa epwapwaka. Eyo yookhala yoohureya. Eyo ehaattharelela alopwana akina. Eyo enookawanya mphento aya. Enookuxa sanamuloko saya saatthuneya ovaha ekereja; enoohonona mwa itthu ikina iwo molumwenkuni. Eyo...Ohiya omphenta Muluku moota sinthuneyaaya, ni okhala mwaha wa Muluku, ni ophenta orwa okereja, kweekwe muhaana omukhanyererya wira arwe.

¹¹⁸ Vano, miyo koosuwela, nno woohikhala khalayi, mu—murumeyi mmosa aahikileela wira owo aarooveleeliha mavekelo manci-ene. . .ittikitti sinci-ene, wira atthu alepe, siiso elaihaka wira yaamurwa oxikola ya Ttiminku miyeeri mithanu na mosa mano wa khula mwaakha.

¹¹⁹ Ni kaahimoona mwali mmosa ohitto wa ntumuxa iwe, weiwo kaaryaaka-wo kivaraka muteko. Vano owo khukhuma vale. Ni miyo keemenle vamukhora, khumana mukhora, nto owo khurwa vamukhora. Ni owo aari mmosa wa anamatikha ala a wildcats, moosuwela.

¹²⁰ Ntoko nikhuru nla awo yaarinaaya waatthukwela oPhoenix nsana ohiyu, kookupali yaari yeeyo, yaapaka epahuwelo ela ya naanaano ya—ya rock-and-roll, wala twister enakhaleru exeeni, ni yaahaana wiiithaniwa mapiliisa wira yaakuxe. Aximiravo, khamunsuwela saana wira eyo erooho ya xetwani? Oovariwa murima ni yeeyo, mpakha awo yahaasuwelasaaya ethu yaaryaaya, yeettesaka mphironi, yiirasaka itthu voohiloka.

¹²¹ Ntoko amosa-amosa wa anamatheiha ala, wala anamarumiha itisku, ni malukutoore, ni siiso, yaaphiyale nipuro nlo, mpooma kaaryaaka-wo. Nto aximwali arulasaka ikuwo saya sa muhina ni orihela vattattaponi, wira mmirav'ola alepe. Khamunsuwela wira owo ti xetwani? Eyo erooho ya mahiku ookiserya. Vekeekhai. Ti yoowuliha muru. Eyo eri vo, aroohureya.

¹²² Mwali ula, owo orookhuma, airaka voohiloka. Owo hata khaasuwenle wira miyo kaari...Aahiliyala wira keemenle vamukhora. Nto owo khwira, "Oh, mukilevelele. Kaahiliyala wira mweemenle vaavo." Nto khunveleeliherya epeeco mmirav'ole muraatiyuni, enakhaleru exeeni, ni khwira,

“Kinimoophwanyani oGreenbrier Patch,” wala enakhaleru exeeni. Awo yaarowa okhalana muthinto mmosa wo wiina ohiyu yoowo.

Nto miyo khimuleela Dr. Brown, yoowo aari mpatthani aka.
 123 Owo khwira, “Muthukumano anyu oneetta sayi wu, Billy?”

Khwira, “Vooreera.” Miyo khwira, “Hiyo ninaavaha ikininu.”

Owo khwira, “Muthinto xeeni wa ikininu?”

124 Miyo khwira, “Thapari sooreera. Eyo tthiri ennaaruuha okathi wothene.” Munnona?

125 Ni ti yoowo okihimenrye eyo, olepa ilaiheryo iyo. Nto miyo khwira, “Dr. Brown, munuupuwela wira namalavula ole a wildcat muraatiyuni aahaana omulepiha mwali ule elaiheryo wira aamurowa okhala weiwe ohiyu ule? Nnakhala. Owo aamweemexerya ikuwo vakhani saawanryaawe, wira ophiye iwe.” Mwaha wa xeeni? Eyo etthu emosa mwa yoowo ephitaann’awe, erooho, ni ethweelelo eyo ya molumwenkuni.

126 Ni mpakha Ekereja ya Muluku mukumi, eniihaniwa Mwaakameliwa a Kristu, okhala yoophitaana ni Muluku siiso, eyo enoothikela yiiwolowaka molumwenkuni, voolokoni va marove va etampi, mpakha eyo ophitaana ni Muluku mwa enamuna emosa, mpakha murima aya okhala woosareya ovuwa ni oweriya wa Muluku, mpakha ehinweryaaya wona etthu ekina woohikhala Kristu. Eyo ekeekhai.

127 Ti yeeyo erinaahu wira. Eyo ti etthunelo emosa paahi, etthokiheryo emosa Muluku orinaawe, ti wira etthu siiso. Muhaana okhala mmwe woohikupaliwa voopakiwa. Muhaana oyariwa mwemmo, kahi ni ovahana matata, wala oruuha ewarakha okereja. Masi oyariwa Mukereja mwa Muluku mukumi, ni oyariwa wa nenli, ni oweriya wa ohihimuwa wa Yesu Kristu, sinookhalihani yoopattuxiwa esya mwa Yoowo. Amen. Eyo ennilakiherya. Eyo enniira. Vekeekhai. Vaareera.

128 Eyo enoohureya. Enoopacerya okawanya mphento aya n’akina, itthu sa molumwenkuni, othweela wa molumwenkuni, erowaka mapuro vahaarinaaya orowaka, ehimiyaka itthu yahaarinaaya ohimiyaka.

129 Nno emaara emosa miyo...Awo yaarinasa ahano... muthinto mmosa wa niira n’ekereja osulu. Khwiiraneya wira kaahikhalana etthu yo wira vathi va empa yeela. Nto kinimooleelani, miyo kihiiwa itthu sootepa onanara okathi waary’aka natampi, masi, muthukumano ole wa athiyana, kiira kihinatoko wiiwa iperwa sootepaxa onanara kookhalaru. Mwaamuwerya otthokelela, mutthu oniisiithana muKristu, ohiyererya soonanara iyo okhuma mwa yaawo?

130 Khimukhanle orikaka maasi oosiva ni ooreera esisterna emosaru. Nyuwo mwahela mucoma veehimeni, nto onikhuma

woosareya anamwiiniha-mwila, hiyo nniwiitthana siiso. Mwahelaru-tho mucoma, onrowa okumiha yeeyo. Esisterna entthuna wuuviwa, ni osarihiwa maasi ooreera.

¹³¹ Ti yeeyo eniireya ni ekereja olelo, naalavulaka mulaponi mothene, wira entthuna wuuviwa, osarihiwa ni maasi oowaarya a Muluku a Wirimu. Murima aya orookhala nlitti na khula etthu enoorwa-vo. Eyo erina anamaphenta a inamuna sothene. Bibilia ohimye wira eyo yaamukhalana. “Oosiveliwa ni soopuha ohiya osiveliwa ni Muluku, atthu ahinaataaniheya, oowootherya akhw’aya, oohisuumaalihya, ni oowaanyokha ale ari a ekeekhai.”

¹³² Omoona muthiyana oniilipiha wira okhaleke oratteene, mulopwana oniilipiha wira okhaleke oratteene, owo onikhala “santu-oophirikeya,” owo onikhala “namathipelela,” wala etthu ya khalayi. Owo onoothanyiwa. Owo t’othanyiwa ni okhoottiwa ni atthu a molumwenkuni mu. Ti yeeyo.

¹³³ Masi mwaahitoko oweha etthu Ekereja y’ekeekhai erinaaya wiiraka? Mwa Waataana Wa Khalayi, okathi waarin’aya mu—mukuttho, awo yaamwiiva mwaapalame mmosa, kuhela ephome ya mmosa vasulu va mukina, muxirikh’awe okhwiiye; nto owo aanvava oviravira elapo, amwaryaka ephome ya muxirikha awe okhwiiye. Ekereja yaphiyerya okhala Mwaakameliwa ekeekhai a Yesu Kristu, Eyo enookuxa Ephome ya Yesu Kristu ni Yeeyo, eyeeheryaka vathi, ekhuwelaka, “Oowarya, oowaarya, oowaarya, t’Apwiya.” Mukhalelo aya, epakeliwo aya yothene enookhala ya Muluku. Ekhalelo aya yothene enookhala ya Muluku. Khimukhanle owehereryaka etthu ekina.

¹³⁴ Tivo atthu anrwaaya okereja, nave. Kahi wira attikheke iturufu ni omuttikha poker, wiina vathi va empa, okhalana olyiwa wa asoopa ni itthu siiso. Eyo ti ya olumwenku. Ni hiyo nihikhalakhale niilikanyihaka ni awo, ni wuuliha muru hiyo weereryaka yeeyo. Nihaana olaleya Erooho Yoowaarya, mwa owerya, ni ohihimuwa wa Kristu. Nookhalana etthu awo ahirinaaya. Nitthareke makhalelo a yeeyo, kahi ophavela waatakiha awo. Nikhaleke ele ensuwelaahu wira t’ekhanle yooloka. Mukhaleke mwa Kristu. Yesu ohimye wira, “Miyo kathomeiwa, Miyo kinimwaaruha atthu othene wa Miyo. Nyuwo mwa maakha a mulaponi. Masi maakha aahiya osiva waya, nto khanreerela etthu masi wiitthiwa ni onyakeliwa ni inawu s’atthu.” Onamoona ahu!

¹³⁵ Khivanxankiha, hata makhuru ahu aPentekosite, vankinanaraaya ohimya, makhuru ahu a aPentekosite ammorela yeeyo, attharaka etthunelo emosaru yeeyo. Ni khivanxankiha atthu ohimya wira kharina etthu anihimiy’aya wira aakhalana. Ekerej’ela ya mweettelo wa pentekosite yaahaana okhala yoophitaanaxa ni owerya wa Muluku Oowerya sothene, mpakha Ekumi ya Yesu Kristu yaarowaaya woonihereya mwa Yeeyo.

¹³⁶ Masi hiyo ninthuna niilikanyiheke ni olumwenku. “Hiyo ninimwiira, khula enamuna.” Munnona? “Hiyo ninthuna nikhalaneeke enamuna ahu ya yeeyo.” Masi khinaakhanle wiiraka. Ti yoovonyeya wira. Ikereja vekeekhai siri ntoko muthiyana, ohureiye.

¹³⁷ Naanaanoru, owo onikhala saana, wopaceryani okathi Muluku oyanre awe Ekereja ela ya pentekosite, miyaakha soophiyaka miloko mixexe wala miloko mithanu sivinre. Eyo yaakhala voowaarya. Eyo yaari yoowaarya. Owerya wa Muluku waari ni yeeyo. Masi nikelalaka ohoolo, nipacerya wiipaka ntoko olumwenku.

¹³⁸ Naanaanoru, nihaana okhalana empa ekhanle yuulupale enttiyelela Metotista vanloothoni vakina. Nihaana okhalana etthu emosa yuulupale, etthu yuulupalexa, ni etthu yuulupalexa, ni etthu yuulupalexa. Ti yoowuliha muru. Anci-ene a hiyo ninimwiihelana naaphiyaka... Munna muPentekosite onoomoona mutthu iwe, mmisawuni mukhaani, wala ekereja ekhaani, nto awo anoorowa ekereja emosa yuulupale. “Hiyo niniira mpantta wa ekereja yoopacerya, wala ekereja yuulupale,” wala etthu siiso; anaaweha yaathanyaka.

¹³⁹ Etthu entthunaanyu ti Erooho Yoowaarya, wira yoophunyaliheni vakhani, ti yeeyo, woosuwelihani wira opatiiso w’ekeekhai wooloka wa Erooho Yoowaarya enoomwiiriha ole a ikuwo sa muhakhu ompatikha ole orina makakawu ni wira, “munna.” Khweeli. Woopowa wekeekhai wa khalayi, owerya wa Muluku Oowerya sothene, ayo, mulopwana, enoomwiiriha ole a evestiitu ya seeta ompatikha ole a kaliko, ni wira, “Munna, miyo kinnoophentani.” Vekeekhai onimwiira.

¹⁴⁰ Masi hiyo niroopacerya okhuma ni olumwenku, ni okuxiwa ni iyaavula. Ekereja ahu erimwiira. Khanirina-tho olavulaka mwaha wa aMetotista ni aPatista. Ti yoohi. Eyo eri mmakhuruni mwahu yoohi. Tivo Erooho Yoowaarya ehikhanlyaaya weetteettaka. Mwaha wa yeeyo kinihimyaaka wira Muluku khokhanle okhalihaka otthuniherya Wawe vasulu wa hata mutthenkeso ohiy’ula. Okhala wira, Amalapo khakuxiwe ntoko nloko nimoso. Awo yaari atthu varyari wa Amalapo, mwaha wa Nsina Nawe. Muluku onimwaakuxa atthu v’omeekha.

¹⁴¹ Vano, miyo kinoona wira mitthenkeso sahu sinnivara muteko wooreera. Eyo ti yooreera. Masi khimukhanle olipanaka yeeyo, wira, “Miyo ka mupentekosite, okhala wira kiniira mpantte wa mutthenkeso wa Pentekosite.” Nyuwo mwa mupentekosite okathi munaakhel’anyu musuwelelo wa pentekosite. Miyo nkincala sinto muniira mpantta wa ekereja Katolika, nyuwo mwa mupentekosite. Khivanweryaneya omuthhokiha Pentekosite. Pentekosite musuwelelo, kahi mutthenkeso. Ni eyo ti yoolikana.

142 Masi hiyo atthu aPentekosite noopacerya wuupuwela, okhala wira nookhalana nsina na Pentekosite, hiyo ninoowerya otthikela nikhalaka molumwenkuni, wira khula etthu entthunaahu. Niri ntoko nimmuwela namukattha a Nimurod; onoopakeya ettuurwa. Ntoko yoowara ya Atamu ya nikukhu na fiiku; eyo enoottika. Ntoko nikokoro Siegfried oFransa, nikokoro Maginot wAlemaanya; naahikomowa.

143 Okhala wira, khaavo namukattha mukina, hata elipelo ekina. “Masi Nsina n’Apwiya ti namukattha oolipa anaxariya antthyawelaaya-wo n’ukhala oolipa.” Mwatthyawelaru Weiwo, munaakhela Nsina, Nsina; kahi wihaniwa Nsina paahi, masi Nsina ni mutthu mukhanlaanyu, Otthara makhalale ntoko a Kristu. Amen. Oothamaleya ti Owo. Ayo.

144 Ekereja yiirale etthu emosaru, eraruwaka muroohoni, ntoko muthiyana aarowa okawanya mphento awe wa aiy’awe ni mulopwana mukina. Muthiyan’owo khomphwanela okhalana. Nyuwo moosuwela eyo. Nto ekereja yaapaceryaka okawanya opatthana waya n’ulumwenku, Muluku ti Muluku a ehace. Owo aahimuhiya Isarayeli mwaha wa yeeyo, nto Mwan’Awe onoohiya eyo siiso.

145 Owo onrowa okhalana Mwaakameliwa oohikhalana ninnyaari mwa Yoowo. Amen. Owo t’orapihiwa othene ni Ephome Awe yoowo mwaneene. Eyo ekeekhaii. Tivo hiyo ninnoona vatthu varyaahu, othelana ohanle orwa.

146 Vano, hiyo ninnoona wira eyo enniraruwa muroohoni, okhuma n’ulumwenku, ehimyaka etthu, ekhalaka etthu ekina yoovirikana. Eyo khenikhalakhala evaraka etthu. Etthu entthuneya ekereja wira, wiira ntoko Estheri siiralyaawe. Estheri aahikhootta ophwaneliwa wa molumwenkuni.

147 Hiyo noosuwela eliivuru iyo yaamukhaani ya Estheri, moota Martokewu. . . Haalu awe aahikhalana mwaana muthiyana. Ni waari okathi wa omwene wa aMedo ni aPersiya. Eyo ethoonyeryo yooreera saana vo. Mwene, mmosa a mamwene aalupalexa mulaponi nihiku nle, owo aarina niira nuulupale. Vano owo khumwiithana pwiyamwene wira orwe akilaathi ni yoowo, masi khuhiira. Owo khukhootta wira. Vano owo iirale exeeni? Owo khaareere wuulihhiwa muru, khaasuwela etthu yo wira, wira amwaar’awe ene khiyaarwiiye.

148 Kinoona wira eyo ti yoolikana saana ni Kristu olelo. Kristu oonilattula wira nikilaathi mapuro a Wirimu ni Yoowo, nto hiyo ninuuliwa muru mwaha wa yeeyo. Atthu anci-ene anuuleliwa muru ohimya wira aakhalana opatiiso wa Erooho Yoowaarya. Atthu aPentekosite, eyo ekeekhaii, awo annuuliwa muru ohimya yeeyo. Hiyo ninuuleliwa muru Yoowo.

149 Nto siiso pwiyamwene khaatthunne orwa. Owo aahikhootta orwa. Eyo yaahimuulihhiwa muru. Wiitho wawe waahixeerya-wo. Atthu othene yaahoona.

¹⁵⁰ Kinniikoha vakhala wira ethoni ya Yesu khenkhala yooxeerya vakhani, nave, okathi Owo onniitthanelaawe muteko, oniitthanela mweettelo wa Pentekosite wa opatthana ni oxinna, nave hiyo niri oowiiithokiha voolipa-vo mwa makhuru makhaani mpakha nihimmuhiyeryaahu mukina. Hiyo nri vanci-ene, nikhalaxaka a molumwenkuni ni itthu siiso, ninuuleliwaahu muru nsina na Pentekosite. Athu akina annoova ohimya. Aniira, “Ahe, miyo—miyo kiniira mpantta. . . Miyo ka muKristu, masi. . .” Kinnitteeliwa murima okhalana musuwelelo w’epentekosite. Amen. Kinnitteeliwa murima okuxaka Nsina na Yesu Kristu. Owo ti mureerelo muulupalexa kitonko aka okhalana, ohimya wira ka epantte ya Yoowo.

¹⁵¹ Vano ninnoona, nto, owo aahaaphwanya anamiruku, wira aakohe etthu aarinaawe wira. Nto awo khwira, “Ela yaathikelaka siisa, athiyana othene akina mulaponi mothene anoothara ethoonyeryo ya muhano oopacerya.”

¹⁵² Vekeekhai, ti yeeyo eniiraneya ohiy’ula. Miyo kinnaaweha axithiyana amosa-amosa ala. Miyo kinroromela wira nkiniwiiniha murima, ni nnakhala vo ti siiso, kinroromela wira kinimwiira. Uh-huh. Ekeekhai. Antthuna ekhaleke ntoko muhano ola oopacerya nno, ni maihi ala oometthiwa ntoko ehikhiri. Miyo nkinatoko wona etthu iyo makhalelo aka othene.

¹⁵³ Nihiku nlo aahikhala muthiyana mmosa aawela vale mulooa weiwo kaalipelelaaka amwaar’aka, nto muru wa muthiyano’owo waari muulupale so, ni yoowootta yooripelela vathi va maitho awe. Miyo khwira, “Mutthike, epalamace. Kinookhala saana.” Yaari etthu yootepaxa woopiha. Yaamuwoopopihani. Exeeni iyo? Muhano oopacerya. Ti muhano oopacerya. Ti yeeyo. Ni awo ankuxa ethoonyeryo ni yeeyo.

¹⁵⁴ Ni mukihye kihimye ela vano. Miyo nkihimye voothweela, masi mwa nlikanyiho, wira moone. Ti yeeyo vekeekhai nyuwo aKristu aalweene muniwiirelaanyu ala amiravo. Vekeekhai voolikana. Muhaana okhala ithoonyeryo. Nyuwo aPentekosite munihimya wira muhaana Erooho Yoowaarya, nyuwo muhaana okhala ethoonyeryo wa aMetotista, ni aPatista, maPrespiteriyaano. Kahi ntoko muhano oopacerya, masi muhaana okhala ntoko Yesu. Owo onnooleelani *Mu* etthu yo wira, moota wo wira. Hiyo nihaana otthara malamulo Awe ni ithoonyeryo. Masi ti siiso hiyo nimphwanyaahu. Estheri. . .

¹⁵⁵ Pwiyamwene ola, owo khaatthunne wiiwa. Owo khaatthunne orwa; aahimuulihaha muru. Khwira, “Vakhala—vakhala wira muhan’ola oopacerya a mmuttetheni onikhaliha ethoonyeryo siiso, athiyana othene akina animwiira. Vano nto okathi mulopwana onimwiitthana awe mwaar’awe, owo onimwiira, ‘Murowe mwapupe muro.’” Munnona? Mmiravo, owo aamuhimye Amerika, kahi siiso? Vano, hiyo ninnoona

wira, airaka siiso, vano aahikhala mulopwana mmosa aarina akhili, aarwiye khunvaha miruku mwene. Owo khwira, “Etthu yo wira omoomola. Ni onviriha mulaponi mothene, ni owiihana aximwali aharusi othene akhanle, aximwali aharusi, nto vaavo mmuthanle mwaar’inyu.”

¹⁵⁶ Eyo yaahimusivela mwene. Tivo owo aahiruma, ni aahaaveleeliha akarumeya athiyana, ni akina, yaakhumme wira—wira yaathanle aximwali othene aharusi yaaweryaaya, athiyana ooreera momweneni mothene ni iporovinsiya owo aarumaawe, yoowo aari muulupalexa molumwenkuni.

¹⁵⁷ Nto vairalyaawe siiso, khurwa mwali ula muYuta. Owo aari oothanyiwa, okhala wira, ntoko Amalapo, moone, owo oomoleliwa epantte emosa. Ni owo khaarina tiithi ni maama. Nto Martokewu, haalu awe t’amulela. Ni owo aahaana orowa, wira athanliwe.

¹⁵⁸ Nto siiso etthu yiirakaaya, awo yaahaana waakuxa aximwali ala wira yaalokihe miyeeri sinci-ene. Awo yaahaana owunkheliha ni waaphwaneliha ni inamuna sothene, ni waatthokiha othene aya, wira ewerye orowa ohoolo wa mwene.

¹⁵⁹ Vano, eyo enihala okhala enamuna olumwenku ontthunaaya oreherya ekereja olelo. Ophwaneliha ni olumwenku; otthariha itthu sa molumwenkuni; ephavelaka okhalana mamempuru anci-ene, ekupaliki khula etthu mopatthanani mwaya. Wulu! Etthu yoowooniha othunku. Mutthenkeso mmosa ophavelaka oxintta mukina, okupali khula etthu ntoko mempuru. Khino munimwaakupali mmutthenkesoni mu, masi awo khankhalakhala akelaka mopatthanani mwa Kristu mpakha okukutthiwa ni oyariwa vasya ni Erooho ya Muluku. Eyo ekeekhaii. Awo pooti okhalana nsina naya muliivuruni nno, masi kahi osulu Iwe, muLiivuruni mw’Ekumi ya Mwaapwittipwitthi, mpakha nilempwe ni Ephome ya Pwiya Yesu.

¹⁶⁰ Athiyana othene, awo yaahiiphwaneliha voomalela, wira yooneyeke oreera. Ni, oh, kinnitthokelela ireerelo saya, khino emutakihaka muhano oopacerya ni siiso. Awo yaahiiphwaneliha voomalela okhala wira yaarowa wiisooniherya ohoolo wa mwene.

¹⁶¹ Kinoona wira eyo ti yoolikana vanci-ene ni ele eniireya ni ikereja sahu olelo. Iyo simphavela wiiphwaneliha voomalela, ntoko olumwenku, ekhalanaka orukuneya wa molumwenkuni, itthu sa molumwenkuni memmo, yiiraka itthu sikhaneli sa molumwenkuni, epatthanaka molumwenkuni, yuupuwelaka wira anoowerya okumana ni Mwene. Muluku khoncaliwa ni yeeyo. Owo ennimmunanara eyo. Masi hiyo nintthuna wira ntoko olumwenku.

¹⁶² Ikereja sahu kamosa-kamosa, ntoko sihimalyaaka, sirooresa iwalelo, yaakupaliki matiyaakono, ni sikina, mukereja, ni imaara sikina mapastore, athenle vaara vaxexe wala vathanu,

ni—ni akina aya aninvura sikaro. Aniira, “Awo ano—awo anookupali. Khivanrowa okhala mulattu.” Animukumiha mulopwana mmosa mpaare ohiyu umosa, khumuhela vapulpitu ohiyu onttharelana. Miyo nkinaamini etthu iyo. Kinaamini wira mulopwan’owo ohaana wehereriwa, ti yeeyo, wehereriwa. Kinooleelani, imaara sinci-ene hiyo niniithana. . .

¹⁶³ Miyo kinnaamini opatiiso wa Erooho Yoowaarya. Kinnaamini olavula ilavulelo, masi kinoona wira hiyo ninoohelaxa ocaliwa mwa yeeyo. Mulopwana pooti olavula ilavulelo, ni muthiyana olavula ilavulelo, nave makhalelo a muthiyaw’owo ni makhalelo amulopwan’owo yaahilikaneke n’ilavulelo anlavulasaaya, vano eyo elavulelo yoovonyeya, okhala wira Erooho Yoowaarya enoowiirihani wira ntoko Bibilia. Eyo enimooruuhanu mpakha omalela wa mukhalelo wa Kristu.

¹⁶⁴ Mmukuxe mutthu onlavula ilavulelo, mukhalelo wo oviruwa onrowa owanana sarothi, onaalavulasa anamwaattamanani, ni itthu sothene siiso. Vano, nyuwo munihana eyo Erooho Yoowaarya? Khekanle okhalaka. Nnari, mulopwana.

¹⁶⁵ Erooho Yoowaarya wiisumaaliha, ohakalala, murettele, ovilela, oreera murima, othunku, ovilela, waamini. Erooho Yoowaarya, owo ti muhokorokho wa Erooho, Erooho Yoowaarya enkumiheryaaya Mukereja mwa Muluku mukumi, emaalelo, ni wiiveviha, wiisumaaliha, ophentana mmosa ni mukhw’awe, ohiviruwa pure.

¹⁶⁶ Munna mmosa aira voonanara, muhimmane wala etthu ekina. Mmurowele moone sintoko munoowerya omuhokoloxa. Muhinwehererye mulaleyi wira. Mwiire nyuwo, mutthu mukina. Mulaleyi khokhanle wiiraka sothene, nnakhala matiyaakono. Atthu othene, okhalaka wira mamempuru a Erutthu ila ya Kristu, yaahaana orowelana mmosa ni mukhw’awe. Nihaana. . . Nto hiyo nakhalana Erooho ya Kristu mwa hiyo. . .Owo ohiixuttiha nlikanyiho nuulupale. Awo yaahihya miloko mithanu na mixexe ni thanu na xexe, khurowela ele emosa. Ti yeeyo entthuneya hiyo wira. Masi hiyo niniira, “Oh, mwaahiye erowe.” Hiyo nihiireke yeeyo. Hiyo nihaana okhala ooreera murima, nilevelelaka, oovilela. Owo ti muhokorokho wa Erooho.

¹⁶⁷ Vano, hiyo ninnoona nto, wira Estheri, nuumala owo. . . Awo yaamuhenle nimosa wa mapuro ala, wira aithhokihe, wira aisooniherye ohoolo wa mwene. Wulu! Owo aahikhoota. Owo khaatthuna. Owo aatthunne okhuma siiso ntoko saaryaawe. Amen.

¹⁶⁸ Olelo nihaana ikereja sintthuna wira ntoko olumwenku, wala okhala wira nihinnuwa. Muluku iirale, “Emaara emosa owo aari mukhaani, awo yaahirumeela Owo. Masi okathi onnunwe awe, vano awo yaahimuliyala.” Eyo ekeekhai.

169 Okathi waarinaahu nikapu nikhaani na laatha nno ephiro ekhaani nipuro nlo, ni ekoma, nimanaka ottuli wa matata ahu; ni ekitara ya khalayi, nirumihaka; ni nikhalanaka muthukumano wa mphironi, mwaari oowiiyeviha. Masi naaphiyeryaka okhalana ipa sa itoolare imilyawu tthaaru wala xexe, n'itthu suulupale siiso, vano ninkhala oowiisonaxa vanliyalaahu yeeyo, ti yeeyo, ookutthiwa ni olumwenku.

170 Miyo kaari nipuro nimoso nihiku nlo vaavo, munna mmosa a osantu, naahikhala nikhuru n'atthu naamuvarela muteko yoowo. Ni khula muthiyana aakhumme vale okathi wa ekafe, wira yaitthyuuwe okathi wa ekafe, khula muthiyana mme aarina maihi ookhuvéya ni oottale epato. Vano, nyuwo muniira, "Munna Branham, kuhiyo mwaha anyu ohimya yeeyo." Mwaha aka. Bibilia onnihimya. Ti yeeyo.

171 Anci-ene w'athiyana aPentekosite anwara ikuwo sa mulopwana, ni Muluku ohimye wira ti yoonanara vamaithoni Vawe. Eyo ekeekhaii. Munwehererya sayi orowa Wirimu siiso? Eyo enooniherya wira Erooho Yoowaarya khekhanle mmo. Erooho Yoowaarya yaakhanle-mo, Eyo yaamoolamulani. Ekeekhai. Oh, khino nyuwo munnikhuwela, olavula ilavulelo, otupha osulu ni vathi, wiina muroohoni. Miyo koowoona aHintu wira yeeyo, ni aHinti, n'itthu sothene sikina. Eyo khenihimya etthu, woohikhala wira anookhala makhalelo anlipiherya etthu enihimyaanyu, owerya wa Erooho Yoowaarya, wira yaakhalihe athu ankhala vooreera murima. Owo ti Mwaakameliwa a Kristu.

172 Estheri aarowa okhala mwaakameliwa, tivo owo khaatthuna hata emosa wa soophwaneliha sa molumwenkuni. Owo aatthunne ovolowa, wa mwene, siiso saaryaawe. Owo aaphwanelinhe ntoko athiyana apentekosite vaatthuneyaaya wira, ni erooho yoomaala yoowiiyeviha. Nto vaviralyaaya, athiyana ala oowiireeriha, ni itthu saya isya sa fandango, mwene aahaaweha, khwaahela mpaani ni ahawala. Masi Estheri ula varwiiyaawe ohoolo wawe, nto owo khuvara erooho ele yoosivela, yowiiyeviha, yowiimaaliha, owo khwira, "Ti yoola. Murowe mwaruue ekhara munwarihe mmuruni mwawe." Ti yeeyo.

173 Awo yiiphwaneliheke ni muthinto yoowo wa erooho, kahi athiyana paahi, masi alopwana, nave, yiiphwaneliheke ni muthinto yoowo wa erooho. Vano munikhala oolikana wira mukhale mwa—Mwaakameliwa, oosivela, oottittimiha. Estheri aahireeriha murima awe.

174 Khaninreere okhapelela ela, ota, oh, ehaana okhalana sinci-ene sookumiha mannyari, ni sinci-ene sa *ela*, wira—wira ekhapeleleke.

175 Nno okathi owo, keemenle m—mmusewu oTennessee. Kivira nipuro naamukhaani, ni wooniheriwa othokosiwa wa erutthu

ya mutthu. Yaahimya wira mutthu aarulela ikhiilu miloko mithanu na mosa ni thanu na tthaaru, mwa itthu sa erutthu aarina ehisapo ya isentavo miloko mithanu na miraru ni xexe. Vano, nyuwo mwa mutthu, khamuhiyo, isentavo miloko mithanu na miraru ni xexe? Nto athiyana amosa-amosa, athiyana aPentekosite, anoowara ekasako ya marta ya itoolare imiya thanu ni anoovenxa muru, wira yaarumpe epula, yaamwaasamiha, nave awo hata khaniphiya isentavo miloko mithanu na miraru ni xexe, ti yeeyo, mwa itthu sa erutthu. Eyo ekeekhaii, kahi eperwa. Eyo ekeekhaii. Isentavo miloko mithanu na miraru ni xexe, ntoko ekhinampo yoophiyerya otathela epuru ya mwalyakhu, ni ekalsiyu vakhani ni siiso. Isentavo miloko mithanu na miraru ni xexe, ni nyuwo munkhapelelaxa yeeyo.

¹⁷⁶ Munoorowa orestaurante nto mumphwanya. . . munooveka muhasa wa soopa ni aakhanle ranttaasi mmo, mwaamukaxaari erestaurante eyo.

¹⁷⁷ Masi munoomuhiya xetwani woopurulelani muxikoni itelevisawu iyo soonanarasa ni itthu sa iturufu, n'umirya; owiirihani owara ikuwo soohifayi, axithiyana ala, ivistiitu iya sikhaani sootita ntoko esalsiixa yooperiwa, ni okhumela nno mphironi siiso. Ni moosuwela, murokor'aka, nkinihimya eyo ntoko eperwa. Munikiwa voovonyeya.

¹⁷⁸ Nwiriwane. Miyo kinihimya ela. Nyuwo muniira siiso, nto Nihiku n'Olamuliwa munimwaalakiwa ntoko namararuwa. Khweeli. Yesu ohimnye wira, "Ole oninweha muthiyana anwereihaka murima oomala oraruwana vamurimani vawe." Nto natampi owo akhala oowaakhula mwaha w'oraruwa, onrowa okhala pani? Nyuwo. T'ani otannyale? Nyuwo. Ti yeeyo. Mwaisooniherya iwo, wira mooniwe ohoolo w'alopwana, wira mukhale ntoko olumwenku ni owara ntoko olumwenku.

¹⁷⁹ Miyo kaahihimya eyo emaara emosa, nto muthiyana mmosa, oLouisville, Kentucky, owo khwira, "Ahe, mwiiwe, Mwenye Branham. Miyo kinimooleeliheryani naanaano va!"

Miyo khwira, "Ayo, muhano?"

Owo khwira, "Owo ti muthinto mmosa paahi wa ivistiitu simpakiwa."

Miyo khwira, "Awo annipaka maakina oottotha ni annitumiha ikuwo sootthanvwa."

¹⁸⁰ Okhala wira nyuwo munootthuna. Yookhala etthu evonyeiye mwa nyuwo. Eyo ekeekhaii voolikana. Nyuwo muniirela kahi mwaha wo okhala muhapo. Muniirela okhala wira muhaana wira. Muniirela okhala wira munootthuna.

¹⁸¹ Muninvura sikaro okhala wira munootthuna. Khamurina wiiraka. Kinoona wira etthu y'ethiruxa kitonko aka woona aari muthiyana aavira mphironi, ntoko siniwoonaanyu atthu othene, ikaaro, ni asikaro awo eriyari ya ikatha saya.

Vano, iwo otakhaliwa. Nlo nipotto naneethanu nuulupale noothetemanaxa nirinaahu mulaponi, okathi mameetiku ni siyensiya a mameetiku anihimyaaya wira t'osareya kankuru ni sothene sikina. Nave awo animwaavura, okathi wothene.

¹⁸² Omoona muthiyana, onihimmwa okhala muKristu, aisookonle vale vakhukuluni, arapaka vootakanxeya, owanre ekuwo y'orapa-no, aisaatalenle vale. Kihaana anamwane axiruisi aili. Nkinihimya wira khiyaarowa wira. Yaamuhimya wira animwiiripihi. Awo yaamwaakhela oriiipihiwa kakhalaru mukumi. Waamukhala oriiipihiwa wa *ela*. Munnona? Aarowa okhala mwaana a Mwenye Branham, ni ethaapwa yoorakama *saale*. Kinaamini wira eyo ti yoonanara.

¹⁸³ Vano hiyo niniisihana, "Oh, hiyo na mempuru a ekereja Pentekosite." Oh, wuuliha muru! Khweeli. Ekereja ya Pentekosite ennitthuna okukutthiwa, okhuma ohoolo mpakha ottuli, ni mpakha empa ya vathi ni vathi, osulu. Ti yeeyo. Ni nnakhala vo, mwa sothene iyo, ti yooreeraxa erinaahu. Masi vanniweryaneya. . .

¹⁸⁴ Ntoko okathi wa mweerukunuweloni ni okathi wa Yohana a wArk, Fransa aanitthuna erukunuwelo, vano yaanimutthuna mulipa-oovirikanya erukunuwelo wira ookolele itthu awo yaakumiheryaaya erukunuwelo.

¹⁸⁵ Ni ekereja ya Pentekosite enimutthuna mulipa-oorukunuweliha. Khweeli. Tthiri enimutthuna. Erukunuwelo voovirikanya itthu sihilonke, ni okupali itthu sikhhanle sooloka, amen, opatiiso osya wa Erooho Yoowaarya: "Ekereja wira yiilokiherye!"

¹⁸⁶ Muupuwele, khenkhalakhala. . .Khimukhanle ohimyaaya wira, "Ahe, vano, miyo kiniira mpantte wa *ela*, Asempeleya. Miyo kiniira mpantte wa ya Ikhomo xexe, wala Ekereja ya Muluku, wala Nsina na Yesu," wala—wala akina wa awo. Nnari! Khimukhanle okelaka mwa hata emosa wa seiyo.

¹⁸⁷ Muluku oniwiitthanani ntoko mutthu voomeekha. Ni ti nyuwo murina wiikukuttha, okhala wira, "Owo onaakuxa atthu wa Amalapo, mwaha wa Nsina Nawe, Mwaakameliwa Awe, Mmalapo."

¹⁸⁸ Estheri aahiikukuttha. Owo aahikukuttha murima awe. Ti yeeyo owo aakukutthale awe. Ti yeeyo ekereja entthunaaya: okukutthiwa wa murima.

"Munikukuttha sayi murima, Munna Branham?"

¹⁸⁹ "Oorapihiwa ni maasi a Masu,' ni Ephome ya Yesu Kristu."

¹⁹⁰ Bibilia ohimmye wira ti yoonanara athiyana wiiraka siiso, ni alopwana waahiyaka awo wira. Eyo eniwaasani nyuwo oowaili. Mulopwana onimuhiya mwaar'awe okhumela mphironi ahiwanre etthu, owanre ikuwo siiso, miyo kirina ntititimiho vakhaani wa owo hata okhala mulopwana. Owo mwaatteepea.

Ti yeeyo. Owo onimwiiriha okhala nttapwatta na iparatho. Wuuliha muru. Mwaahaana okhala alopwana.

¹⁹¹ Ni pastore ontthuniherya ekereja awe itthu iyo, ohipwapwelaka eyo okhuma vapulpitu. Owo nikeneyeya. Ninaatthunaahu alopwana, Ehapari yooreera, kahi ni iluuva sa mphira, masi ni owerya ni wooniherya wa Erooho Yoowaarya, ni Masu. Bibilia onihimya wira itthu iya ti soonanara. Ti yoonanara atthu wiiraka siiso, wiiraka siiso. Ehaana olaleeriwa, ni okhaliwa, ni mapuro othene. Wala, ekereja entthuna oreerihiwa, okukutthiwa.

¹⁹² Estheri aahireeriha murima awe ohoolo wa Muluku, ni aaisoonihenrye ni erooho yoomaala ni yoowiiyeviha; Ekereja enrowa okhala Mwaakameliwa a Kristu. Vano, muupuwele, Estheri aahikhootta ophwaneliwa wa molumwenkuni. Owo aakuxale Erooho mmurimani mwawe, wira arowe ohoolo wa mwene.

¹⁹³ Ni muthiyana olelo, ekereja enuupuwela wira enoorowa ovolowa mwaha wo wira ehaana mamempuru oowaatta, wira ti atthu oowaraxa saana, erina mutthenkeso muulupalexa, ekereja yuulupalexa mpooma, ni itthu siiso, munoo haleela eyo ikilomo emilyawu sene vakhala wira munlipa ni yeeyo.

¹⁹⁴ Eyo erooho yoosivela, yoophenteya, yottittimiha Masu a Muluku, “orapihiwa ni maasi a Masu,” ni Masu mwa nyuwo. Orapihiwa. Amen. Ekereja entthuna orapihiwa, orapiha wa Ehapari yooreera yoomalela. Ti yeeyo. Kahi orapihiwa epante emosa paahi, masi orapiha wa Ehapari yooreera yoomalela, ookukutthiwa, “ookhalihwa soopattuxiwa isya mwa Kristu Yesu.”

¹⁹⁵ Mwaakameliwa a Yesu kahiyo mwaakameliwa oottakatta. Owo khaarowa omwaakhela Mwaakameliwa Awe, oottakatta.

¹⁹⁶ Vaakhanle wira muthiyana aarweela otheliwa, khunooneya ntoko onoomalaru okhuma munikhomani mwa ikuluwe iwe; mulopwana orina nttittimiho mwa yoowo, khaarowa omuthela. Owo aammwiirela wira aikukutthe.

¹⁹⁷ Ni okathi ekereja ya Kristu enrwaaya wira etheliwe, khiyuupuwela wira eyo enookela mwa Mwaakameliwa, ephitaanne ni olumwenku wothene mwa yeeyo, Mwaakameliwa a Kristu khonrowa okhala siiso. Nnari, mulopwana.

Kihaana waakuva.

¹⁹⁸ Nnakhala Ekereja ya Kristu, ya Pwiya Yesu Kristu, Ekereja eyo kehiyo Ekereja yoothaalasa, nnakhala, ni mattapwatta oomalamala a miromolelo. Eyo kherina okhalaka mempuru a muromolelo muulupale. Eyo ehaana okhala yoorapihiwa ni Ephome, yoothummwa ni Ephome. Kahi enihimya wira niniira mpante wa ekereja yuulupalexa, mutthenkeso muulupalexa, wala *ela*, *ele*, wala *ekina*. Eyo ehaana okhala yooloka,

yooreerihwa, yoowaarya, yoohikhalana nlepa wala ninnyaari, ni Ephome ya—Moopoli aya, Yesu Kristu.

¹⁹⁹ Ntoko Estheri, Mutthu oowiipithihiwa mmurimani, Mutthu oowiipithihiwa, omaala ni oreera murima wa Erooho ya Muluku, mmurimani mwa mutthu; kahi ovuwa ni muloko wa molumwenkuni.

²⁰⁰ Miyo kweekwe kinnihimyaka wira olumwenku onnaarya; Ehapari yooreera enookokola. Oh, eyo eri ikilomo emilyawu voovirikana. Hollywood onimwaarya; Ekereja ya Kristu enookokola ni ophenta, ni ereerelo murima, ni osivela, ophenteya. Ti yeeyo.

²⁰¹ Estheri khaatthunne wiiphwaneliha ni iwarelo sothene sa vano sa molumwenkuni. Eyo khiyaarowa okhala ntoko mwaara a mwene.

²⁰² Ni hiyo, nitthunaka okhala ntoko olumwenku, ni eyo enimooneya ntoko Mwaara a Mulopwana Oowaarya? Hiyo, ntoko Ekereja ya Muluku mukumi, wiiphwaneliha ni itthu sa molumwenkuni, vano nto wooneya ntoko Mwaara a Mutthu Oowaarya? Eyo enimooneya okhala y'ephattu?

²⁰³ Mwaamonne mulopwana mmosa olelo, vaatthuneya wira akhale mulopwana oowaarya; va onoorwa mwaar'awe, ntoko muhano oopacerya, ni maihi oovasiwa voowoolowaseya *sa*; ni itthu sooxeerya epantte emosa, ni itthu sooripelela epantte ekina, ni—ni ooneyaka ntoko oroomaniwa owanoni ni epinseeli; ni muthinto ola sothene wa itthu siiso, eettaka mphironi, ni ikuwo iyo sikhaani sootita ntoko esalsiixa siiso; ni maxittha oorakama ntoko *so*, athukumelihaka erutthu, etteettaka mphironi; ni wira, “Ole mwaara a mulopwana oowaarya?” Miyo nkinihimya iperwa. Miyo kinihimya moolumo paahi.

²⁰⁴ Kaahirwa mpakha mmosa wa meettelo sahu sa Pentekosite, nno woohikhala khalayi. Kaahookola eheema. Nto pastore khukiirela, khwira, “Amwaar'aka t'aninrumiha orkawu.”

Miyo khwira, “Ti yooreera, munna.”

“Enimoonanarani yarumiha vale?”

Miyo khwira, “Nnari. Nnari, mulopwana. Vekeekhai nnari.”

²⁰⁵ Vano owo khurowa wa mukhapeleli a muteko. Mukhapeleli a muteko khwira, Munna Baxter, khwira, “Khiva mulattu.”

²⁰⁶ Owo khwira, “Munna Branham, murwe va. Kintthuna wira mwaasuwele amwaar'aka.” Vano miyo khurowa vale.

²⁰⁷ Xontte kileveleliwe. Munnona? Miyo nkineererya, ohimya mo—moonelo. Kimphavela ohimya nuulumo. Munnona?

²⁰⁸ Nto muthiyany'owo aarina manikuure ala nno. Miyo nkisuwenle. Etthu iyo, nyuwo moosuwela, othene oowiisoottiha, ni kiira kihinatoko woona yeeyo kookhalaru; ni evistiitu yaakhuveela vathi *va*, yoohikhuneeliwa ottuli, ni ntoko

yookhhalana etthu vathi. Ni miyo—miyo nkinatoko woona ewarelo eyo kookhalaru. Ni aahikhalana ipirinku suulupale silenleyaka *sa*, ni itthu soowaatta owanre-ene.

209 Vano miyo khuwehaweha. Miyo khuupuwela, “Oh, miyo!” Miyo ka muPatista, ni koosuwela wira ele kheri saana. Miyo khuweha-tho. Miyo khwira . . .

210 Vano, xontte, ela kehiyo eperwa. Masi kaahaana omuhimeerya munn’owo, ni kinroromela wira yaahimukhaliherya. Nkinihimya wira kikhale oovirikana; kaairaka siiso, kaamukhala namirima miili, moone, kaamutthuna okukutthiwa, yoomi.

Miyo khwira, “Mwenye, nyuwo mwiirale amwaar’inyu yaari santu?”

Khwira, “Oh, ayo.”

211 Miyo khwira, “Ankhala ntoko ootakhala, wa miyo.” Miyo khwira, “Miyo—miyo nkinatoko woona etthu ntoko eyo kookhalaru, ntoko mwaara a murumeyi. Eyo khenooneya ntoko mwaara a mulopwana oowaarya.”

212 Ni nnakhala ekereja ya Muluku mukumi, elipanaka mihapo saya, meera aya a exa, ni meera a cuuku, ni ottikha iturufu, ni soowiina, ni ipatthanelo, eniiphwaneliha siiso, n’ulumwenku, khenooneya ntoko Mwaakameliwa a Muluku Oowaarya. Yaavuraka asikaro, ni wiina, ni meera, ni waalya asoopa, ni soowurya sootakanxiwa, ni sothene siiso, ni ohimya wira awo ti Mwaakameliwa a Kristu? Khanooneya ntoko Mwaara a Mulopwana Oowaarya, wa miyo. Nnari, mulopwana. Owo khaarowa othanla etthu siiso. Owo aarowa omuthanla muthiyana aarowa okhala ooloka, oowooneya ntoko ele Owo omphavelaawe othoonyerya. Miyo kinnaamini wira eyo ekeekhahi. Eyo pooti owereya vakhani.

213 Ame aka atokweene a okuusini aarowa. Okathi waary’aka mwammiravo, naanikhalanaka . . . Waanirika, okhalana etthu y’olya, naakhalanaka ekhutte ni mukatthe wa nakuhuwo. Nkisuwenle sinto munnisuwela exeeni iyo wala nnari. Tivo khinaakhalanaka . . . Awo khiyaakhalana hata makhura mwaakha ntero, nto hiyo naahaana okuxa nikapu nuulupale na khalayi *so*, ni ohela esapala ya enama mwemmo. Naarowaka nipuro yaathikiliwaaya, wala anamahita yaathikilaaya enama ni onivaha esapala. Nto hiyo naamukaphuliha, wira nikumihe makhura ni oyeeherya mmwe.

214 Khula Esaapatu ohiyu, amaama yiraka wira naanitthuna makhura a ikhura. Ni miyo—miyo nkinwerya ovilela etthu iyo nave. Ni kaahaana owurya. Kaamwaarweela, kiphunyaka ephula aka *sa*. Kaamwiira, “Maama, miyo—miyo nkinwerya.” Kaamwiira, “Khanreere okeettiha murima.”

Awo yaaira, “Yaahiweettiheni murima, khanooreerelani etthu.”

²¹⁵ Tivo kinoona wira ti siiso olaleya Ehapari yooreera. Eyo yaahoothukumeliheni vakhaani, okhaliha yawinyu... wootannyani saana olya wanyu wa erooho, woowereihani vakhaani, wira mwiithokose ni Bibilia: wona vakhala wira oviruwa iwo, ni wiisoona, otakhala, ophenta olumwenku, etelevisawu, ni itthu ohiyu; ni ohiya ekereja moohikhala etthu, ni ikhukulu soohikilaathiwa. Nave, mwaahaana okhala ota iwo ntoko Yesu, mwaarina-ene Erooho Awe mwa nyuwo, mphavelaka wira athu othene mulaponi arwe okereja wanyu, wira emwaakhele Kristu. Vano hiyo niniisihana nto Mwaakameliwa a Kristu? Oh, wooniha othunku, mpatthani!

²¹⁶ Okathi woophiya. “Mwaakameliwa Awe ohiilokiherya.” Oh! “Ohiilokiherya.” Oohiya epante aya itthu iya sothene. Muupuwele, Estheri t’athanliwe, nto akina khukhoottiwa. Ni ale paahi ayariwe vasya, arina Erooho ya Muluku, anrowa okhala Oothanliwa Nihiku nlo, ekhara ya ovuwa enrowaaya owarihiwa vamuru Vawe. Nto akina anrowa okhoottiwa.

²¹⁷ Mukihiye kooleleni etthu ekhaani ekhumelenle. Miyo—miyo, miyo ka misiyonaariyu, ntoko sinsuwelaanyu, kinvara muteko wa omisiyonaariyu wa ehapari, kookhala ntoko imaara thanu na piili ilapo s’okhopela, mulaponi mothene. Nno, woohikhala khalayi, epooma y’oRooma, Rooma ti epooma yuulupale ya miteko s’oratta. Ni weiwo yaahikhalaniwa exikola ya miteko s’oratta, nto anci-ene wa amiravo ahu a wAmerika annirowa weiwo khula mwaakha, wira yaakhele mwaakha mmosa wala miili so oxuttihiwa miteko s’oratta, wiixutta opintari ilatarato. Naahikhala nikhuru n’amiravo a wAmerika naaronwe weiwe, miyaakha vakhani sivinre, ntoko sileeliwaaka ehantisi ene. Nto vaphiyanse aya iwe, awo khunahureya ntoko oophako. Yakhala oRooma, awo aniira ntoko Rooma: anookhuma n’uwurya, n’urula ikuwo, ni itthu sothene sikina, ni wira voohiloka, amiravo n’axiruusi.

²¹⁸ Ni yaahikhala exikola. Nto exikola ela, naahiphya-wo nla—nikhuru nla n’amiravo a wAmerika. Nto othene yaaira, ntoko, etthu emosaru. Masi mwali mmosa, owo kheemererya eyo, nnakhala. Owo khaakhumaka. Ohiyu, owo aamusoma akina yeettasaka ota awuryasaka. Othana, owo aavara muteko, osoma. Ahe, owo aari namanyoholiwa a exikola yothene. Vano owo aamwiisiinanela ntoko muhano, aaiseettiha ntoko muhano. Anaamwi yaakhanle amiravo aRooma iwe ni sothene, yatthuna wira owo akhumeke, owo aamukhootta. Nnari, mulopwana. Owo aakhalaka vale ni masomi awe, axuttaka okweretha, ni opintari, kiireke. Vano owo aakhalaka ni yeeyo.

²¹⁹ Vookiserya, mulipa-oosuka mmosa mutokweene vapuwani aaninweha, onaka wira owo aari oovirikana saana, onaamwi

aari muKatolika muRooma, aakhala anwehaka, moota aaiseettihaawe. Ohiyu umosa, mwali, oparki weiwo—waari exituutyu, vano, wala nipuro awo yaarinaaya exikola, owo aahikhuma khuneetta vapuwani, khuwela mpakha osulu va ntumuxa, vano nsuwa naamutupweela. Ni owo eemenle vaavo, ni wiitho wawe wooreera, woothuwa, ni maihi awe oorakama emorelaka vathi, awehaka epantte ele *iwe* waatupweela nsuwa.

²²⁰ Mulipa-oosuka aanvela vaniyateni. Owo aakhala anwehaka mwali, okathi waavelaawe vaniyateni. Etthu emosa yaakhala emuleelaka paahi, “Rowani, mwalavule ni yoole.” Vano owo khumpweha ansiinyu awe vathi, khurula exapheyo awe yoopepheya, khweetta mpakha nipuro aari mwali. Khuukuttha mmilo awe. Owo khurukunuwa. Ole khwira, “Mukilevelele, muhano.”

Owo khwira, “Ayo, mulopwana. Vekeekhai.”

²²¹ Vano owo khuweha wira ole aahikhala anlaka. Othene akina yaari vaniirani n’ohapaliwa nuulupale ohiyu wothene. Owo khwira, “Muhano, kinromela wira munookiwa mwa enamuna yooloka, wira kinrowa olavula paahi ni nyuwo.” Khwira, “Nyuwo munnikhala va, voovikana miyaakha miili vano. Ni kooweha wira nikhuru murwanne anyu, kweekwe ankhala mmeerani, ni okathi wothene anrwaasa ohiyu, oohapalasiwa, ni ewaranse ikuwo nuusu, ni itthu sothene. Masi kooweha wira nyuwo khimunkhalaka mmeerani mmo.” Ni khwira, “Miyoy—miyo kinniweha wira, enkhala ntoko, wira nyuwo okathi wothene munnikhala nwehaka epantte ekina y’ephareya. Makaanipi, nyuwo munoorowa osulu nno, ni weemela va khula makaaripi, ni oweha nsuwa nitupweelaka.” Ni khwira, “Exeeni, exeeni eniiraha yeeyo?” Khwira, “Miyoy ka mulopwana mutokweene. Ni ki—kinnitthuna osuwela exeeni enirruha ovirikana nno wa nyuwo ni akina.”

²²² Owo khwira, “Ayo, mulopwana.” Owo khwira, “Mwenye, kinweha owaani nsuwa naatupweelaka.” Owo khwira, “Epantte ekina, ya nsuwa iwe t’eri elapo aka.” Nto owo khwira, “Muttetthe ole yookhala estaatu emosa. Nto estaatu yeeyo yookhala epooma emosa. Ni epooma yeeyo yookhala empa khata. Nto mpaani mmo ookhala mmiravo mmosa.” Khwira, “Owo, nave, muratti. Vakhumme aka, orwa nno, kaahimulaiherya mphento aka. Hiyo noolaiheriyana mmosa ni mukhw’awe.”

²²³ Ni owo khwira, “Hata wira akina a awo aniira exeeni, eyo kherina naata ni miyo.” Owo khwira, “Miyoy koommana natiri okhala ooromeleya ni vooreera.” Ni owo khwira, “Kinnilipelela nihiku kinrowaaka wooka kiryeene vasulu va mapupha a ntteeke nle nuulupale ninrowa okiroiha epantte ekina ya ephareya ninrowa okipweha ammorela matteeke weiwo onrowaawe okumana ni miyo. Owo onteka empa, ni ninrowa okhala vamosa muttetthe yoowo.”

224 Ni khwira, “Mwaha wa yeeyo kiniiraaka ntoko kiniiraaka. Miyo kinikhala oororomeleya ni natiri ommanenlyaaka mmiravo mmosa. Ni owo t’ororomeleya ni natiri owo okimanenlyaawe.” Khwira, “Kinnimwiiwaka owo, imaara kamosa-kamosa, ni miyo kinnimulepelaka ewarakha, ni,” khwira, “ninnilepelana ewarakha mmosa ni mukhw’awe. Ninnittitimiha olaihana wahu, nilipelelaka nihiku ninkumanaahu.”

225 Oh, moota eyo yaarowaaya omureerela muKristu eekeekhai, wiivalaaniha ni itthu sa molumwenkuni. Nto nihiku nlo, olavula sa ophiya opatari, vasulu va mapupha a Epompa! Owo onimurweela Mwaakameliwa, mmosa ohincaliwa n’ulumwenku wala itthu sa molumwenkuni. Owo oorapihiwa Mphomeni mwa Mwaapwittipwitthi. Owo oomulaiherya Awawe—Ophenta Wawe Yoowo paahi. Ophenta wa molumwenkuni woomala ni ohookhwa wa Yoowo. “Othela wa Mwaapwittipwitthi ohaattamela, ni Mwaakameliwa Awe ohiilokiherya.”

Nrowe nuupuwele yeeyo nuuramihaka muru ahu okathi vakhani paahi.

226 Nihiku nlo, kiwehaka ontupweela nsuwa, ni miyo, miyaakha miloko miraru ni mmosa sivinre, koolaihana ni Mmosa kimpentalyaaka, onvaha ophenta waka wothene Yoowo. Miyo okathi wothene kinniphavela olipa mwa Owo ni Masu Awe, mapuro othene onrowaaka. Koosuwela wira aakhala anciene akina akilaanthe va, siiso, anlipelela nihiku paketi owo a khalayi a oSiyoni onrwaawe opatari, okuxa munepa ahu ni oniroiha mpakha Mukhalelo wa Ole hiyo onimpentaahu ni nimulaihenryaahu mphento ahu.

227 Siiso akhanle-ene akina va ohiy’ula, ahinatoko opaka mulaiheryo yoowo. Siiso akhanle-ene akina apanke nave khuhonona. Mwaaryeene mukhalelo yoowo ohiy’ula, mpatthani, muhintthikela-ni ohiy’ula muuluula mulaiheryo anyu? Mwaira, muhinapake. Muhinrweela-ni opaka ohiy’ula? Mwiire, “Pwiya Yesu, miyo kinnooophentani.”

228 Muupuwele, mwaira mpanke-ene mulaiheryo anyu, nave nlelo munatakaiha ni itthu sa molumwenkuni, Yesu khonrowa okhalana mwaakameliwa siiso. Owo khonrowa okhalana mmosa okhanle namararuwa. Ophenta wanyu wothene ohaana okhala wa Yoowo. Ni nyuwo mwaaphentaka itthu sa molumwenkuni, ni mihapo sa olumwenku ula, ovikanaxa omphenta Muluku, vano khimunatthi wiilokiherya.

229 Ookhala mutthu ene yoowo mu ohiy’ula, nuuramme-ene muru, onrowa ovenxa ntata, wira, “Munna Branham, mukivekelele. Miyo tthiri kintthuna kikhale siiso. Miyo—miyo kintthuna kikhale epantte ya Mwaakameliwa. Ni koosuwela wira kiniira itthu kahaarinaaka wiiraka. Mukivekelele?” Muluku ooreeriheni, murokor’aka Muhinti. Muluku ooreeriheni, murokor’aka. Ni nyuwo, munn’aka. Ni nyuwo, munna. Mutthu

mukina tho? Nvenxe ntata, mwiire, “Mukivekelele, Munna Branham. Miyo—miyo—miyo—miyo koosuwela wira nkikhanle saana.”

²³⁰ Vano mukhale naxariya mmansinyu. Nwehe ottuli makhalelo anyu. Muhaana oweha ottuli muhinatthi orowa ohooho. Nwehe ele munkhalakaanyu. Nwehe erooho murinaanyu etthu yoopakinhe-ayani. Vakhala wira khamu. . . Mwaahimyaka okhala muKristu, nave nlelo nyuwo nlelo munatakaiha ni itthu sa molumwenkuni, munna mulopwana, muthiyana, mukhanle okhalaka sayi woohikhala ohoona mwaahooneke-ru wira moovonya?

²³¹ Ookhala mutthu iirale nihiku nlo, khwira, “Munna Branham, nyuwo mwaahaana waahiya atthu siiso.” Khwira, “Athu aniwiihanani profeta.”

Miyo khwira, “Miyo nkihiyo profeta.”

²³² Khwira, “Masi atthu anuupuwela wira mwa yoowo. Nyuwo mwaahaana owiixuttiha athiyana ala. Ohikhanle waaleela awo owara maihi oorakama ni muthinto wa ikuwo sooreerela ni itthu siiso, nyuwo mwaahaana waaleela moota wo ophwanya itthu sa erooho.”

²³³ Miyo khwira, “Kinwerya sayi owiixuttiha alxepira, awo ehimwaakhelaka hata ABC, exikola ya anamwane? Kharina hata olakeya woolimaleleya wira yiikukutthe, yiisiihanaka ‘Mwaakameliwa a Kristu!’” Miyo nkinihimya eyo voonanariwa. Miyo kinihimya eyo ni ophenta wa Muluku.

²³⁴ Ntoko sihimalyaaka voosiis’ula, kaawonneni mukhuruwelaka muratthi mmwaatiyani, ni owoonani murowaka omana ekhwarara, wira mwaatiya owo khonrowa olipa, miyo kookhuwelelakani ni woopwapwelani, nkimphavela woonanarihani. Kinnoophentani. Okhala wira, mwaahiire, ekumi anyu enoopweteya.

²³⁵ Ookhala mukina, onvenxa matata nihinatthi ovekela? Kinniwoonani, ota iwo. Muluku ooreeriheni, ni nyuwo, nyuwo. Moosuwela wira makhalelo anyu annooniherya wira moovonya. Nyuwo nlelo munniphenta olumwenku onvikana Muluku, vano yookhala etthu ehilonke nipuro nlo. Nkaiweheni. Musaala ota iwo, nvenxe ntata, mwiire, “Mukivekelele, Munna Branham.” Muluku ooreeriheni. Muluku. . . Ti yeeyo. Ohimya exariya, miyo—miyo kinnixankela okhala naxariya.

²³⁶ Owo t’uri mulattu ni ekereja Pentekosite ololo. Hiyo khanrina exariya eyo y’ekeekhai naakhalanakaahu. Khanirina ominyala wo o—orwa ni ohimya yeeyo, okupali wira noovonya. Xetwani oroovarelelaxa ekereja vootakhalexa mpakha eniiwolowaaya mmaroveni mwa olumwenku. Muhiireke yeeyo.

²³⁷ Makhalelo anyu annooniherya wira khamurina etthu munihimyaanyu wira mookhalana. Vano muhinihimerya-ni?

“Ole onihimya itampi sawe onooleveliwa: ole onikhuwa itampi sawe itthu khinimweettela saana.” Khivanweryaneya okhuwa. Muluku onnisuwela sothene sa yeeyo. Nto nyuwo moona ni mwasuwela wira khamunkhala oratteene, vano xeeni ohilapaka, mukhuma musuweliha?

²³⁸ “Itampi s’atthu amosa-amosa sinrowa ohoolo waya; akina sinimwaatthara.” Sawaka sirowe ohoolo. Mukihiye kihimye sawaka sothene naanaano va. Mmuhiye Muluku alokihe. Ti yeeyo yaatthuneya hiyo wira.

²³⁹ Aakhala matata oophiyaka mathanu na mosa wala mathanu na mararu avenxiwe. Vekeekhai aakhala oovikana yaawo mukereja mu yaamukhaani, ohiy’ula, y’atthu emiya wala imiya piili va, wala khino emiya ni miloko mithanu. Muluku ooreeriheni, mmiravo. Vano, Muluku ooreeriheni, muhano. Muluku ooreeriheni, murokor’aka. Ti yeeyo. Muluku ooreeriheni, mwan’aka. Ti yooeera.

²⁴⁰ [Nipuro vahiitthu mufiitani—Mol.]...-athiyana apentekosite khiyaametthaka maihi aya, masi awo anniira olole. Exeeni yiiraneieye? Awo khayiisootti...khayi—khayiisoottihaka itthu wiitho. Ame anyu khayiiraka, yaakhanleru mupentekosite. Exeeni yiiraneieye olole? Okhala wira awo animwiiwolowa mwa itthu sa molumwenkuni. Nto olumwenku onniweha hiyo. Hiyo ninihimya okhala Ekereja ya osantu. Mulattu ene xeeni? Hiyo khaninkhala ntoko Mwaakameliwa a Kristu. Wa nyuwo alopwana muneettasa iwo, etthu emosaru. Munna, wuuliha muru.

²⁴¹ Tithi a Wirimu, kaawehaka va, ni kinaihana waltaari mwa enamuna ntoko eyo, kipwapwelaka, kipwanyulaka, enkhala wira ntoko ti yoolipa. Masi muhina mwa miyo onivuuva ephome, kisuwelaka wira ninkhuveela wookiseryani. Miyaatiya iya sikhaani sinoorowa okakhanyuwa, nihiku nlo. Okhala onoorowa omana, ni ikhotto. Nto imaara kavi kiihaniwaka epantte aya, ni owiwa awo wira, “Oh, Munna Branham, vaakhanle wira kaaniwerya otthikela-tho okhala.” Nto, ala aweryaka, Pwiya, elokihe!

²⁴² Miyo kinniilipiha. Muluku, Erooho Yoowaarya ewuupululele atthu, wira miyo kimpavela paahi waakhaliherya, kahi waanyemela. Masi, ntoko Paulo sihimaly’awe, a khalayi! Muluku, miyo nkinthuna wira awo ekhale oonanarihiwa, masi kintthuna kaasikulihe voophiyerya wira awo yoone vatthu avonyalyaaya.

²⁴³ Miyo kinvekela wira Nyuwo munivahe, ohiy’ula, atthu ala, anvenxa matata, ni—ni hata nttittimiho woophiyerya wira—wira esuwele, ohoolo wa Muluku, wira aavonya, ni annitthuna okhala oratteene. “Mphaveleke, munoophwanya. Mmane, munoohuleliwa.” Masi mwaahikhalakhale mmanaka,

Owo onrowa ohula sayi? Mwaahikhalakhale mphavelaka, munrowa ophwanya sayi?

²⁴⁴ Mutthuniherye Erooho Yoowaarya, Pwiya, yaaruuhe athu ala wiivahererya voomalela wa Muluku, ohiy'ula. Tithi muulupale a Pwiya'ahu Yesu Kristu mwaareerihe, munepa, erutthu, ni erooho, ni mwaakhalihe voopuroni mw'Erutthuni ya Pwiya Yesu Kristu. "Maana othela wa Mwaapwittipwitthi onnaattamela, ni Mwaakameliwa Awe ohiilokiherya." O Pwiya, ola okhale p'uhiyu wo wiitthokiha, maana meelo pooti okhala nihiku ninkumanaahu ni Yoowo. Hiyo khanisuwenle okathi xeni onrowaahu wiitthaniwa wira nakumane ni Yoowo. Munivahe, Pwiya.

²⁴⁵ Vano okathi onlompaaka, vano nyuwo murina muru anyu wowuurama. Othene nyuwo nvenxale ntata, mwakhala a xariya voowiixerya ni yeeyo, ni vekeekhai a ehakhi, ni muhinuuliwa muru waahiya athu osuwela wira munnivonyaka! Munoorowa okhala ni yaawo Woolamuliwani, khula enamuna. Ni Muluku oohela okupali woophiyerya mwa nyuwo, wira moosuwela wira moovonya.

²⁴⁶ Nno okathi vakhani ovinre, miyo kaalaleya etthu siiso. Kilavula ni mwali mmosa eemenle ottuli iwe. Owo aakhala ntoko ootepa, mwaana a murumeyi. Nto owo khukilipelela ota wa ekereja, ni evaseryo ya maihi owo aakivahalyawe! Owo khwira, "Nyuwo khamunsuwela etthu." Mwali, oohilakeya, iyano soopintariwa; maihi ookhoveya, oometthiwa. Owo khwira, "Miyo kamutthuna mutthu wira akileele yeeyo, kinoomphwanya mutthu orina muupuwelo wooloka." Khwira, "Muhikhalakhale murwaaka vapulpituni v'atithi aka olaleya-tho etthu siiso."

²⁴⁷ Miyo khwira, "Muntthuna okileela wira, atithi anyu, mulaleyi ooloka a nneema muPatista ntoko siryaya, khiyaarowa olaleya epwapwelaka yeeyo?"

Owo khwira, "Awo khawitthanenleni woolivani orwa va . . ."

Khwira, "Awo khakilinve, hata vakhani. Miyo kirwenle mwaha wo olattuliwa."

Owo khwira, "Miyo nkinkhalakhala koolevelelakani mwaha wa yeeyo."

²⁴⁸ Miyo khwira, "Eyo ti yawinyu. Miyo kitthanre Ehapari yooreera paahi." Maluwa yaamuttikinyeya vale ni ettheke vakhani. Mwali ooreera.

²⁴⁹ Okathi vakhani ohoolo waya, voophiyaka mwaakha ntero ohoolo waya, miyo kaahivira epooma yeeyo. Kaahimoonna mwali ene yoole ni esaaya awe elenleyaka, anvuraka sikaro, eettaka mphironi. Miyo khuupuwela, "Ole mwaara a Munna *Lexe ni lexe*, ahiiso, mwaana." Miyo kitupha ephiro, wira koone sinto kaamuwerya omphwanya.

250 Owo khukiweha, anvuraka sikaro ola, khumwiiseela mphulani. Owo khwira, “Sayi, mulaleyi,” ni nsu noonyohola, siiso.

Miyo khwira, “Salama, salama!”

Khwira, “Nkanvureni sikaro aka. Mukhale mulopwana.”

Khwira, “Khamunuuliwa muru mmansinyu?”

251 Owo khukeliha ntata mpoolosani mwawe, khwira, “Vano mukuxeni sikaro mmosa.”

252 Miyo khwira, “Wuuliha muru. Mwaahaana wuuliwa muru, onvaha murumeyi a Muluku sikaro.”

Owo khwira, “Nto khino munoowurya musuuphani mwaka.”

Miyo khwira, “Xontte muhimye eyo.”

253 Miyo khunweha. Kaahooceela ohinla, okhala wira atithi awe mulopwana mmosa ooreera murima. Miyo khunweha. Miyo kuupuwela, “Oh, wulu! Owo uupuwela wira aahikhalana okathi munci-ene.”

254 Miyo kipacerya weetta. Nkaawenrye ohimoroxa maithori. Miyo kitthikela keettaka. Owo khwira, “Mulipelele minuutu mmosa.”

Miyo khwira, “Ayo, muthiyana?”

255 Owo khutthika. Yaanikhala yoowuuliha muru olavula n’uwo mphironi, athu eviraka. Owo khwaattama. Owo khwira, “Moosuwela etthu mwaakihimenryanyu ohiy’ule?”

Miyo khwira, “Miyo okathi wothene kinimuupuwela.”

256 Khwira, “Kintthuna kooleeleni, mulaleyi, mwaahikhalana exariya.” Owo khwira, “Kooriipiha murima Erooho Yoowaarya emaara yookiserya.” Vano, nla ti nuulumo muthiyano owo aakihimenryawe, ni nkinkhalakhala kiliyalaka, kakhalaru mukumi. Owo iirale, “Owo aavaanyihana ni miyo ohiy’ule. Masi,” khwira, “okathi omukhottaly’aka Owo okathi ule, yaari emaara aka yookiserya.” Khwira, “Murim’aka onkhalaka woolipaxa; vahincaliwaaka ni Muluku, ekereja, wala hat’etthu ekina. Kinnaanyemula atithi aka, khula nihiku.” Nto owo khwira, “Kinniwerya woona munepa w’ame aka waarikeyaka omooroni, ntoko mukatthe, ni otheya.” Iwo oriiipiha murima Erooho Yoowaarya emaara yookiserya. Muupuwele yeeyo.

257 Nirowe Owaani vasulu va mapupha a Epompa. Nrowe nikhale Mwaakameliwa. Nvenye voopuroni vanyu vano, nyuwo mwaavonnye-ene. Murwe nno. Mweemele va waltaari mwiire, “Miyo kinnivonyaka. Munna Branham, miyo kinniviruwa pure. Wala, miyo—miyo—miyo kinikhala vootakhala. Miyo—miyo nkaakhanle wiiraka itthu iya siniiraaka. Munna Branham, miyo kiihira *ela*, *ele*, wala *ekina*. Miyo koottheke mwaha wo wootha. Koottheke mwaha wo wiiya. Miyo koottheke mwaha w’etthu. Nkinimurumeela Muluku mwa enamuna vantthuneyaaya,

ni kinnuuliwa muru yoomi, ni kintthuna makhalelo aka elokhiwe. Khamunikivekelela va ohiy'ula, Munna Branham?" Kinootteeliwa murima wira yeeyo.

²⁵⁸ Muluku aakhulaka mavekelo aka, owiwa aretta, ohoona, ni ooxanka, Owo vekeekhai onimwiiwa nivekelo mwaha wa natampi. Muhinrweelani mukhala epantte ya Mwaakameliwa ohiy'ula? Kinoolattulani wira murwe.

²⁵⁹ Kooxukhuru, munn'aka. Miyo kinnixankela ominyala iwo enamuna yeeyo, onkhuma n'ukupali wira moovonya. Muluku ooreeriheni, munna. Mweemele *va*.

²⁶⁰ Muntthuna okileela wira, mwaamuwerya ovenxa ntata nanyu khuhikhala naxariya wa yeeyo? Exeeni ewiirale atthu? Munna, mulattu ene xeeni? Mulattu ene xeeni n'atthu ahu nihiku nla? Muntthuna ohimya wira mwaanvenxa ntata, wira moovonya, vano nto khuhinarwa? Ni musuwele, "Ole onsuwela wira yooreera, nave khuhinaira, wa yoowo ti yootakhala." Muhinrweelani?

Okathi napiyaano, xontte, munna, naorkawu, muusika vakhani paahi.

²⁶¹ Kinimoolattulani. Kintthuna kookoheni. Akavi vamuthukumanoni va ankhalaka mmithukumanoni okathi... Moosuwela wira nkihiyo mulaleyi. Nkisomme.

²⁶² Muluku ooreeriheni, mwamuthiyana. Ontthuneya mwaaruusi eekeekhai wira aire yeeyo. Nikhuru nla noowiipa naamukhaani nirwaaka va, mureerihwe, munn'aka. Iwo ominyala saana. Miyo—miyo kinnimuxankela mwaamuthiyano. Muluku ooreeriheni, oophentiwa. Kookhalana wnanamwane mwaamuthiyana owaani, oolikana ni munnuwelo anyu, Rebekah mwaamukhaani. Miyo kinnoottittimihani. Mwaaruusi Muhinti? Muluku ooreeriheni, oophentiwa, mwaana a mwene ola mwaamukhaani. Muluku akhale ni nyuwo, oophentiwa. Nyuwo, mwaamuurokor'aka, Muluku akhale ni nyuwo. Nave ni nyuwo, murokor'aka.

²⁶³ Vano, nkawehani va. Vakhala wira aximwali ntoko awo, axiruusi axikhaani, oosivela mwa muupuwelo; n'ulaleya mutthaka onaathikila kapatti-kapatti, nto va awo anoorwasa va, asuwelaka wira awo aavonya, weemela va ohoolo wa muthukumano wira alape. Vekeekhai, vekeekhai nyuwo athiyana atokweene, muhinrweelani? Murwe nno, ni mweemele va.

Miyo kaamphavela wiitho Wanyu;
Nvonihe erooho aka, yoovulala yooriipiwa
murima.

Nrowe niipe.

Mukoopole ni mahala Anyu.

Moopoli, Moopoli,

Mwiiwe . . .

264 Vekeekhai nyuwo mwa naxariya voophiyerya wira nvekele nivekelo no wiiyeviha, “Mwiihane, Pwiya, mukithokose, moone yaakhanle-ene etthu evonyeie ni miyo.”

Muhikivire.

Muluku ooreeriheni, munna oophentiwa.

265 Akavi vamuthukumanoni va akhanle khoona, vamuthukumanoni, athiyana, alopwana, n’atthu, othene, ovira keemenle-ene kaavekelelaka aretta, ni Erooho Yoowaarya waahimeerya itthu, sa itampi saya ni itthu, ni osuwela? Akavi a nyuwo ansuwela wira ekeekhaii? Khenivonyaka. Erooho Yoowaarya enookileela, Erooho Yoowaarya yeeyo emosaru, wira yookhala etthu mu ohiy’ula enriipiha murima Yeeyo. Vano, eyo ti SIISO ANIHIMYA T’APWIYA. Vano, mukumane ni yeeyo va, wala Iwe.

266 Miyo nkhiyo mutthu oottharelela miyoonelo. Nnari, mulopwana. Kinnisuwela oratteene vatthu vamphwanyaney’aka, ni miyo—miyo kinnimusuwela Muluku. Ti yeeyo. Aakhala anci-ene a nyuwo antthuneya weemela vaava ari axiruisi ala. Vano, khamuntthuna orwa? Miyo kinimoolattulani. Nkinrowa okhanyererya. Kinimooleelani paahi.

267 Mutthu mmosa aairale, “Nkinaiweke wiitthana wa waltaari vaavo murumeyi aapwapwelaawe muthukumano, mwa itthu siiso.”

268 Ti siiso varinaaya wiiriwa. Khimunrwa ni ehantisi ya murima woowiiniwa, mayi mmosa akhwaaka wala etthu. Eyo, eyo ti vathi vowuukhuwa. Munrwa vathi va Masu a Muluku. Nyuwo khamunrwa vathi va wuukhuwa. Munrwa mwaaminiki wira Muluku Mulukuu, ni muri mpa m’ophukiwa mwa Apwiya. Ni munrwa, nvekelelaka mwaha anyu.

269 Muluku ooreeriheni, munn’aka, murokor’aka. Kintthuna kivare ntata nanyu, kiire kinnittitimiha ekupalelo anyu ya xariya. Mwamuthiyana, miyo kinnoottittimihani. Muluku ooreeriheni. Owo oovaheni Erooho ele yoominyala. Mureerihawe, munn’aka. Muluku akhale ni nyuwo.

270 Emaara ekina, numala ninrowa omaliha. Pooti omala emaara yookiserya, nave. Munnona? Nkisuwenle liini. Kinroromela wira nnari. Masi pooti okhala. Munnona?

Moopoli . . .

271 Murwe va, murokor’aka. Kintthuna koovaheni ntata, kooxukhuru. Miyo kinnittitimiha waamini iwo. Iwo waamini wooloka.

272 Murwe va, munn’aka. Kintthuna kivahane ntata ni nyuwo, vaava va. Kinnittitimiha exariya anyu. Muluku ooreeriheni.

273 Murwe va. Muluku ooreeriheni. Kinnittittimiha exariya anyu, weemererya . . .

. . .kivire.

Moopoli . . .

274 Exeeni? “Othela wa Mwaapwittipwitthi ohoorwa, ni Mwaakameliwa Awe ohiilokiherya.”

. . .wunla wowiyeviha;

Okathi o . . .

Muhikivire. (Exeeni?)

Kinroromela iphwanelelo Sanyu paahi,

Miyo kaamphavela wiitho Wanyu;

Nvonihe erooho aka, yoovulala yooriipiwa

murima, (Vaavo Masu anthikilaaya.)

Mukoopole ni mahala Anyu.

Moopoli, Moopoli,

Mwiiwe wiiyeviha waka . . .

Mwaawitthanaka akina,

Oh, muhikivire.

275 Muupuwele, Erooho Yoowaarya t’ethikinle mmurimani mwanyu, nto khurwa va. Muupuwele paahi mapuro Eyo enthikilaaya, nto mutth’uwo khonkhalakhala aliyalaka. Okathi wothene animuupuwela eyo. “Murima ahu waahinilamuleke.” Masi mwaarwaaka n’itthu mwa Masu a Muluku, nto nyuwo khunahaleela, owo kuhiyo Osuulu w’Abrahamu. Abrahamu aahimusuka natiri a Muluku mmurimani mwawe, voohicala etthu xeeni jaarwa wala jaarowa.

276 Kinnaattittimiha othene ala yeemenle waltaari. Mavekelo aka wa nyuwo, wira Muluku oovaheni entthuna murim’anyu ohiy’ula, ni ookhaliheni atthu oowaarya vekeekhai.

277 Amosa amosa w’aximiravo ala, va aakhala Ahinti, Aspaanya, aMexico, othene yeemenle-ene, atthu anihimyaka okhala aKristu, khino, mwa miyaakha, masi annoona wira ti yoovonyeya. Awo antthuna okhala oratteene. “Ooreeriwa t’ale anvoliwa etala ni nthona mwaha w’exariya, okhala wira anoovona.” Vookupali, oolikana wira elokihe ni Muluku, mwa altaari a mooro a exariya ya Muluku.

278 Muhaana okumana ni yeeyo nipuro nlo, apatthani. Muhaana okumana n’iyo nipuro nlo, tivo mukumane ni yeeyo vaava. Muhilipelele mpakha voosiisu. Nyuwo pooti wiiviwa ohiyu yoola, mwa ehasara, murowaka owaani.

279 Naanaanoxa vamuthukumanoni, kaahitthana waltaari, nto—nto kiiitthana, kinoona wira waari Ohio. Nto ohiy’ule, kikhuma mpaani, sivira ntoko minuutu muloko ni mithanu kikhumme. Kimwiiwa mutthu akhuwelaka, okerekhene wa rampha. Keemela, kirowa vaavale. Ekaaro yaaroophwanya ehasara, yaroomanana ni ekina. Nto muthiyana mmosa

aakilaanthe vaavale, oowuukhuwa saana, khurula epeetthe awe, khareere wuukhuleya. Owo khukhwa. Nto owo aalavula ni mwan'awe muthiyana, mphironi, yoowo eettiha. Yaari ni yoowo vale, oolikana wira emuroihe oxipiritali. Ni oowaili aya yaahaana wira erwiiye waltaari. Nto mwan'awe khwira, "Amaama, nuulumo nookiserya yaakihimenryaya ekaaro ehinatthi omanana, 'Kihiiira yoonanara ohiy'ula. Koosuwela wira kihiiira.'" Nto vale ekumi awe yaahikuxiwa.

Oh, nyuwo muniira, "Eyo khenrowa okikhumelela." Yaamuweryaneya. Yaamuweryaneya.

²⁸⁰ Ni ankhi Erooho Yoowaarya yaahitthikele-tho woopwapwelani ni wooleelani wira moovonya? Vano munookhuma murwaka mwa Ohimala siiso. Ni nyuwo moosuwela, ni muthinto owo wa erooho, khamunwerya wira. Mulopwana, muthokose makhalelo anyu, moone moota munkhalakaanyu. Ni nwehe ottuli moone sinto eyo ekumi ile yoosivela, yoowiiyeviha ya Kristu, vakhala wira ennilikana ni Masu Awe othene. Yaahikhale, weeso murwe mukhalihe oratteene. Yookhala...Xeeni-xeeni okuxaka erantteliho, erimu eryeene yoosareya iparakha sa pentekosite s'eekeekhai errowa okukuttha murim'anyu, oreeriha munepa anyu? Eyo kahi ekeekhai?

²⁸¹ Arumeyi akavi ari mu ohiy'ula? Kintthuna amosa-amosa a nyuwo axinna murwe nno ni hiyo. Ti siiso, munna? Ayo. Murwe osulu nno, xontte, minuutu mmosa paahi, axinna? Ti yeeyo.

²⁸² Yesu oohimya, Mmasuni mwAwe, "Ole oniiwa Masu Aka, ni onimwaamini Ole okirumme, ookhalana Ekumi Ehinimala; khanrowa olamuliwa, masi oovira mookhwaani khuphwanya Ekumi." Yohani Oowaarya 6 ohimnye wira, "Vano Miyo kinoomuhihimuxa nihiku nookiserya," ohihimuwa.

²⁸³ Atthu, hiyo, nihaana ovira mwa yeeyo. Nihaana wira. Ehaana wiiriwa tu. Tivo e...Kahi wuukhuwa. Iyuukhuwelo sinrowa ni yeeyo, vekeekhai. Ti yeeyo. Masi etthu ene t'ila, murima wo wiivahererya.

²⁸⁴ Mukuxe Masu a Muluku paahi, mwiire, "Muluku, miyo koovonya. Kinniiniwa murima wira yeeyo. Nyuwo munnisuwela murim'aka. Kihiiira yoonanara. Vaava va ni mulipiheryo yoola, kinnilapa soovonya saka. Ni okhuma ohiyu yoola, mpakha ohoolo, kinoororomeleya wa Nyuwo. Miyo ka epantte ya Mwaakameliwa. Miyo nkiniira-tho *yeeyo*; nkinihiya-tho oviruwa waka okhuma. Kina-kinaamwiira ntoko muhano. Miyo kinaamwiira ntoko mulopwana oolakeya. Miyo kinaamwiira itthu Bibilia onihimyaawe wira kiireke. Miyo kinimookuxani naanaano vootthariha Masu Anyu." Vano nyuwo munooophwanya etthu.

²⁸⁵ Munnaamini yeeyo, alaleyi a Ehapari yooreera? Eyo Ekeekhai? Ti yeeyo.

²⁸⁶ Vano, nrowe nuurame muru nivekelaka vano, khula mmosa a nyuwo, mwa enamuna anyu.

²⁸⁷ Muupuwele, vakhiviru ni nyuwo ori Kristu. Ohoolo wanyu, nno valtaari, amphwanyaneya aKristu avekelaka. Ottuli wanyu; arumeyi a Ehapari yooreera avekelaka. Vano, eyo ennookelihani mwa mukhalelo wa mavekelo.

²⁸⁸ Vano, olapa wanyu, mmurimani mwanyu, enamuna anyu mmansinyu: “Pwiya, miyo koovonya. Kinniiniwa murima, Pwiya, wira itthu iya. Miyo vano kinnilapa etampi aka. Kinniwaaminini. Miyo kinnookupalini Nyuwo vano. Kintthuna kikhale epannte ya Mwaakameliwa. Mwa Nsina na Yesu kinnivekela.”

Vano, mukhale ni olapa wanyu vamurimani vanyu vano. Vano kinrowa woovekelelani.

²⁸⁹ Tithi a Wirimu, moota enikiriipihaaya murima imaara sikina kaawehaka atthu anikiphenta, ni woona moota Nyuwo munkuxaanyu Masu ni olakiherya Yaawo. Eyo vekeekahi ennithikila mpakha vankumanyiwa makhuva, masi nto Nyuwo munoorwa naanaanoru olupiherya wira Ekeekhaii. Eyo Ekeekhaii.

²⁹⁰ Va yeemenle alopwana n’athiyana, hata aximwali axikhaani, axiruusi yeemenle va yuuraminhe muru, ni maithori mmaithoni mwaya, vamakumano wa ekumi. Kinoona wira vaavo yaakhanlyaaya ohiyaka, eyo yo wiikirikinya, rock and roll, nikhuru noovariwa ni xetwani, noohaaxiwa ni xetwani. Awo ari va, yeemenle-ene va ohiy’ula ni mirima saya soowivaha, atthunaka etthu emosa awo akhanlyaya ohelaka-vo matata aya, wira yiire, “Pwiya Muluku, mukikukutthe itthu sothene sa molumwenkuni.”

²⁹¹ Va ari alopwana a munnuwelo w’eriyari, amiravo, athiyana atokweene, aximwali, othene yeemenle vamosa. Awo anoohimya wira aavonya. Nyuwo muroolavula ni murim’aya; awo khayaarowa okhala va. Eyo enooniherya wira khayaarowa hata ovenya vakhukuluni vaya, vahikhanle wira ethanelo ehiiriwa. Erooho ya Muluku yaari vakhiviru ni yaawo, ni—ni khwira, “Nyuwo moovonya.”

Ni makhalelo aya makhaani khwira, “Pwiya, vano kinootthunani Nyuwo.”

Nto xetwani khwira, “Mukhale oomaala.”

²⁹² Masi Erooho ya Muluku khwira, “Nvenye.” Ni awo yeetta yiiwelelaka, ni yeemelaka waltaari nno.

²⁹³ Vano, ntoko sihimmy’aka wa Nyuwo Masu Anyu, “Ole onrwa wa Miyo, hata mano nkinimurihela ota. Hata itampi sanyu sinakhalaru ntoko sooxeerya, sinookhala sootteelela ntoko maralala; soophilivila ntoko ekarmesim, inootteelihiwa ntoko manri. Murwe muthume wa Miyo, eviinyu ni makhura. Mahala

aka annoophiyeryani. Ole oniiwa Masu Aka, ni onimwaamini Ole okirumme, ookhalana Ekumi ehinimala; ni khanrowa olamuliwa, masi oovira mookhwaani khuphwanyanya Ekumi. Nto vano othela wa Mwaapwittipwitthi onnaattamela, ni Mwaakameliwa ohiilokiherya.”

²⁹⁴ Tithi, awo t’Awinyu. Awo ti itthuwo sa Masu Anyu. Awo ari va wira erapihiwe ni maasi a Masu, okhala wira eyo Ehapari yooreera yoomalela. Eyo kheniinanela etthu. Yoothikila voowiixerya, wira yaapwapwele anamwane. Eyo emphela mitathaari, mitathaari soowaawa, mi—mi—mitathaari sa ohicaliwa, mitathaari sa molumwenkuni. Mphele, Pwiya, ni Erooho Yoowaarya. Mukumihe mw’atthu ala.

²⁹⁵ Miyo kinniunlela awo waaruuha wa Nyuwo ohiyu ula, Yesu, ntoko muhakhu Anyu yeenyu, ntoko maniya v’ekharani Vanyu, ntoko mamempuru a Mwaakameliwa Anyu. Miyo kinninlela ekumi aya. Miyo kinvekela ni murim’aka wothene, n’alaleyi ala, arumeyi ala a Muluku mukumi. Miyo kinvekela wira Nyuwo mukumihe mwa yaawo, Pwiya, itthu sa molumwenkuni, ni mwaavahe ominyala wira yeemele ohoolo wa Satana. Munivahe, Pwiya. Hiyo ninnaamini wira Nyuwo munimwiira. Nyuwo muhimmye wira, “Mwaavekele Atithi etthu p’itthu mwa Nsina Naka, Miyo kinimwiira.” Vano, Nyuwo khimunahimyeke wira, “Ah, khino Miyo kinimwiira.” Nyuwo muhimmye wira, “Miyo kinimwiira.” Ni kinnaamini wira eyo ekeekhaii.

²⁹⁶ Vano, yoolempwa-tho mwa Soolempwa, “Mwa Nsina Naka anoowoomola axetwani.” Ti xetwani onimukuxa mwali wala muthiyana, khuhonona makhalelo awe. Owo xetwani aarowa omukuxa mulopwana khuhonona makhalelo awe. Ni kinoohimya ehantisi ila yaamukhaani, Pwiya, mmavekeloni mwaka. Ni kinvekela wira Nyuwo mukiiwe, ni mwaakhule mavekelo aka, wira khula mmosa a ala okuxiwe ohiy’ula ekhale maniya a Omwene. Awo ahoorwa. Ni kihaana waakhula mwaha wa moolumo aka ohiy’ula. Nto va awo ahoorwa weemela ni miyo, ni okuxa opuro ahu epannte ya Kristu.

²⁹⁷ Vano, Satana, mooxinttiwa. Nyuwo khimwaahiyale akina wa awo ovira, masi khamuxinttale ekhotto. Yesu ohimmye wira, “Ole onrwa wa Miyo, hata mano nkinimurihela ota.”

²⁹⁸ Satana, miyo kinooleelani nyuwo, wira nihiku nimosaaahikhala mwammiravo mmosa aasukiha ipwittipwitthi s’atithi awe. Nto mwatto mmosa khukela khuvara emosa aya, khukuxa, ohaaxaka vootakhala, ni aarowa okhuura. Masi makampusi ula mwaamukhaani eekeekhai, owo khaarina etthu woohikhala pharancikula, masi owo aanimwaamini Muluku mukumi. Owo aahimutthimakela mwatto owo, ni khunvara, nto owo—owo aahimwiiva. Owo aahimurukunuwela, vano owo khunvara ireru

sawe khumwiiva. Owo aahikumiha epwittipwitthi mwaano mw'awe, khuttikiherya mmunyepuni wira evonihiwe.

²⁹⁹ Nyuwo mookuxa ipwittipwitthi iya sooreeraxa sa Muluku, axithiyana ala, mwaametthinhe anyu maihi aya ni wiisoottiha itthu wiitho, ni anooneya ntoko itthu Bibilia ompwapwelaawe, ni muupuwela wira mwaahaakuxa. Masi miyo kinoorwa ni pharancikula ola mwaamukhaani a nivekelo. Miyo kinimwaahokoloxa ohiy'ula. Khimunwerya-tho waaverelela. Moxinttiwa ekhotto. Alopwana ala oophenteyaxa yeemenle va, amwaapwittipwitthi a Muluku, mwaahiye. Hiyo ninnoorumani, mwa Nsina na Pwiya Yesu Kristu. Miyo kinihela eriyari ya mihapo iya ni oviruwa, ni onamuttompe n'itthu p'itthu, miyo kinihela-tho Ephome ya Yesu Kristu, mwaha wo waamini, eriyari aya ni etthu yeeyo. Nyuwo khimunaavara-tho. Awo ari mmunyepuni mwa Atithi. Awo an'Aya. Muhiwaattame. Mwa Nsina na Yesu Kristu, miyo kinnoorumani.

³⁰⁰ Khaavo hata xetwani omooroni onwerya wookwannanyi, mwaaminiru yeeyo. Nyuwo mookhuneeliwa ni Ephome. Nyuwo moorukureriwa ni mavekelo, arumeyi a Ehapari yooreera, ni anamithaka a waataana, nivekelo. Othene nyuwo mweemenle va, murwiye va, musuwelaka wira mwaahikhhalana mihapo, soovonya, ni itthu muuleeliwaanyu muru. Nyuwo vano mwapweharu waltaari wa Muluku a olamula a eporonse, ni mukupali naanaano va ntoko oleveleliwa wanyu, wira Kristu onnoovahani, munoovaha mukuttho owo ni waamini, nvenxaka ntata ni wira, "Miyo vano kinookupali. Yoomalamala. Nto okhuma olelo mpakha ohoolo, nkinthikela-tho wira"? Munoopoliwa ni Ephome ya Yesu Kristu. Amen. Amen. Attottopeliwe Muluku.

Ookhala mutthu mukina aatthuna orwa, wiitakaniha nnikhuru nla?

³⁰¹ Ookhala onwereiwa mpaani, aatthuna ovenya wira ovekeleliwe okathi ene yoola? Avenye.

³⁰² Kintthuna khula mmosa a nyuwo va, mwaahikhale me—mwaahikhale mempuru a ekereja yooreera ya Ehapari yooreera yoomalela, murowe wa emosa, wa ela mwawerya vale, mwaakhalaka vakhiviru va. Muthukumane ni pastore ni mpatisiwe. Vano nto mwiira muhaakhenle Erooho Yoowaarya, munvekele Muluku oovaheni Erooho Yoowaarya ni oosariheni, ookhaliheni mempuru a Mwaakameliwa.

³⁰³ Nkaaweheni vale, axinna, aretta. Xetwani khonwerya waavarelela atthu ale. Ola okathi wootaphuwa. Aleluya! Khimunaamini yeeyo?

Nrowe nuurame muru wira nivekele.

³⁰⁴ Ni khula mmosa a nyuwo iwo, murina eretta, nyuwo mweemenle, mwiixatheryane matata mmosa ni mukhw'awe. Yesu Kristu ohimnye wira, "Ithoonyeryo iya sinimwaatthara


ale anrowa waamini. Awo yawiixaatherya matata aretta, awo anoopenuwa.” Mpweheryane matata mmosa ni mukhw’awe. Vano, muhiivekelele mmansinyu. Mmuvekelele mutthu vakhiviru mumpwehenryanyu matata, okhala wira awo anoovekelelani nyuwo.

Nrowe nivekele vamosa vano ntoko Ekereja y’eKristu.

³⁰⁵ Pwiya Yesu, hiyo ninnixukhuru mwaha wo oxintta ohiy’ula, minepa sinoorwa wa Nyuwo. Vano, xetwani orookuxa ipwittipwitthi Sanyu sikina, ni eretta. Hiyo ninrweela okuxa-tho. Nto ntoko Ekereja ya Muluku mukumi, hiyo ninnimpwapwela xetwani, ni wira, “Mwaahiye atthu ala aretta, Satana. Hiyo ninnoorumani mwa Nsina na Yesu Kristu, wira awo avonihiwe.” Bibilia ohimye wira, “Ithoonyeryo iya sinimwaatthara ale anrowa waamini. Awo yawiixaatherya matata aretta, awo anoopenuwa.” Owo ti natiri a Muluku, ni hiyo noosuwela wira eyo ekeekhaii. Awo aavonihiwa ni makhwatta a Pwiya Yesu Kristu.

³⁰⁶ Vano, mwaaminiki vale, nvenxe matata mmuttotlopele Yoowo. Amen.

³⁰⁷ Vaareera, pastore, yothene ti yawinyu. Muluku ooreeriheni, munna. Yaahireera saana okhala ni nyuwo ohiy’ula. Muluku akhale ni nyuwo.

Muluku ooreeriheni, axinna va. 

62-0121E Othela Wa Mwaapwittipwitthi
Tapernakulu Opatthana
Phoenix, Arizona wAmerika

EMAKHUWA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Olopola mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyawe musurukhu vahikhanle n'utthuniheriwa woolempwa ni Voice Of God Recordings®. Mwaaphavelaka wiiwa-tho wala ikaruma sikina sikhhanle, xontte mulavule ni:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org